



漢書門

一	二	三	四	五	六	七	八	九	十
冊	架	函	號	號	號	號	號	號	號

庫文閣內	
內閣文庫	
番號	漢 11789
冊數	24 (19)
函號	297 43



資治新書二集卷之十三目次

告示部

民事一 清戶役

均役示

嚴革見年

糧役示

民事二 均田賦

均田示

民事三 招復

招歸善縣難民




陳大來

賈膠侯

高寓公

顧南樓

李包閣



資治新書二集卷之十三目

卷十三

芥子園

民事四 勸開荒

勸諭開荒等事

咨訪民情事

民事五 禁勒報開墾

禁懸報熟地

禁懸坐開荒

再禁懸坐開荒

民事六 查隱漏地畝

察隱地

民事七 重鄉約

選鄉約

鐸書示

民事八 嚴保甲

活保甲條諭

嚴查奸宄示

民事九 恤商民

禁官價

恤商民

除行戶

諭行戶

顏孝敘

喻念茲

賈膠侯

賈膠侯

賈膠侯

賈膠侯

蔡魁吾

蔡魁吾

周欒園

呂長木

蔡魁吾

賈膠侯

曾道扶

劉耀薇

資治新書二集卷十三目

二

芥子園

諭行戶

白九峯

懸鑼察弊事

王望如

民事十一 庶務

禁違例放債

李含馨

嚴禁違 旨背律等事

周櫟園

蠲豁亡丁

蔡魁吾

告示 禁搶火

陳司貞

斬放火兇犯後曉諭軍民

陳司貞

誠諭出洋愚民 以上俱入民事補

陳司貞

嚴保甲示 入民事八

李毅可

靈隱禁約示

梁冶涓 終

資治新書二集卷之十三

湖上笠翁李 漁菟輯

婿沈心友 因訂

民事一 清戶役

均役示

漳南 陳大來 諱啓泰 蓋州人

為嚴禁漏富差貧以避窮民積困事照得民徭之重今實堪憂力役之征古所不免處今日而欲民安耕鑿之常不歎差徭之苦此必不得之數也但照糧米當差富者役多貧者役少尚于困苦之中猶享均平之福乃有糧多頑戶慣使安逸之錢不任繁勞之事或借庇于鄉紳或挽情于游客或倩衙蠹舞文或挽

後漢書卷一百一十五
李代桃僵莫
劣衿抗法將上手苦役卸之下手貧民李代桃僵莫
可控訴甚有以里催見年等役十年一輪之差亦冒
官戶生員戶託情求免者是單戶小民永無息肩之
日而素封大族常偷高枕之安矣茲本道蒞任伊始
一切民困誓與蠲除而均平戶役其首事也除牌行
各屬印官以後輪點戶役及簽派民夫等項不論紳
衿百姓俱照糧數當差一概不准優免外合行出示
曉諭示後如有賄囑濫免等弊許受害里民指名控
訴以憑嚴究

嚴革見年

陝西賈膠侯諱漢復
巡撫曲沃人

為見年禁革已久有司陽奉陰違再行嚴禁以信
功令以甦民困事照得各州縣設立見年實屬民間
大累先曾奉 旨革除又經本部院嚴禁不啻三令
五申矣邇來如咸長等縣革除銅弊者固多中有一
肖有司私用見年者仍復不少切思督催錢糧自有
里排什則何用見年又何至屢禁不革即此屢禁不
革知非無故而然細詰其由則以見年之設雖損于
民而實大利于官故也如錢糧則應吏收官解官侵
耗銀役索常例而以起解責之見年傾銷路費添搭
等項俱令見年出備如號馬草料額有站銀站銀官

役侵肥。草料則派見年供應。驛馬倒斃。應動正項錢糧。正項八已。則馬令見年買補。損轎馬夫民皂等役。自有經制。額設工食。工食官役侵扣。勒令見年私幫。或因上司差人催提事件。責令見年起發。或稱夫馬不足。勒令見年僱夫貼馬。甚有過往安置。供應餽送。以及本官需用。紬帛布疋。米麵蔬菜什物等項。件件出諸見年。所謂取之無窮。用之不竭者。見年是也。夫官受見年之利者。如彼。見年受官之累者。如此。無怪見年不敢近官。而官之不肯去見年也。且見年一立衙役。視爲奇貨。如明歲值當見年。今冬先遞認狀。見

面召保等事。行行有費。及其任事之後。或稽查保甲。逃入等事。月月取給。則月月有費。稍不遂意。則拘鎖辱毆。凌虐百端。夫衙役受見年之累者。如彼。見年受衙役之害者。如此。無怪乎見年疾衙役如讐。而衙役趨見年若鶩。不欲使官去之也。嗟嗟小民。竭數年胼胝之力。盡生平積蓄之資。只須見年一役。遂足蕩產傾家。本部院言念及此。能不痛恨。除密行嚴訪。叅拿外。合再申禁。爲此仰本官。即便嚴行所屬各州縣。務要恪遵。功令。洗滌肺腸。凡有見年者。乘本部院未經察出。速速革除。仍刊刻木榜。堅立縣前。使人人曉

諭該廳時加廉訪倘有仍前不遵法令尙用見年未
革者卽據實指名揭報以便飛章奏處云

糧役示

涇縣高寓公議承擬
嘉興人

爲永定糧役以除積害事照得涇縣南北運米九七
千餘石舊例將邑中戶甲分爲四區名爲糧長輪充
是役每十年一次惟是田有多寡分區各派已有不
均之歎邇來米價甚貴及官軍交兌需索常例費出
無名遂至每米一石貼銀三兩有奇在田多糧廣之
區已爲十損其一若以小區克之役未終而田已賣
甚矣役重之難支也且其中之虧弊更有不勝言者

如所分之區有田過萬畝者有不及百畝者其相去
之數不啻霄壤而均派使費一無重輕則少者何辜
而多者一何幸耶此其弊之明者也又有將克本戶
現年豫將其田詭寄他戶及他戶將克現年又將其
田仍歸本戶則奸民豪戶之田永無當差應役之日
而其苦悉歸于忠厚小民此其弊之暗者也有田
多糧廣之大區利于現年之省費賄通里書及該房
弔扯下戶甲之田使之貼費朋黨及至輪該下手
費用雖多而其田已寥寥無幾是輕者愈輕而重者
愈重此之爲弊又在不明不暗之間者也邑田止有

此數一在奸民蠹役移東移西扯來扯去。縣官能知而不能禁。小民敢怒而不敢言。養弊縱奸。害將安底。今本縣不避怨勞。為爾民力清此弊。除兇軍使費。本縣恪遵祖制。盡革陋規。以押旗軍橫索外。復嚴加釐正。通計合邑共田若干。十年輪克戶役。每年派出若干。永立定額。不使區有大小。費有輕重。派定之後。即使田有開除變賣。至年分輪及。仍令扯回扣數。以期適均。行之經久。自能無弊。爾民毋得再圖躲閃。自貽伊戚。須至示者。

民事二 均田賦

均田示

六合 顧南樓 高郵人

為奉憲編審。詳定均田。以甦民困。以垂永久事。照得則壤定賦。王制有不易之規。計產均輸。編氓守一成之法。凡列版圖。罔敢踰越。但民間消長不齊。戶口增除靡定。故十年大造。以便推收。法至善也。本縣承乏茲土。編戶僅一十九里。而其中偏枯舛謬。不可勝言。甚至一甲而寥寥數畝。一甲而積畝數千。無怪阡陌連田。而膏腴坐擁。立錐無地。而煩苦莫支。此從來流弊。極重難返之勢也。本縣待罪以來。稍有禪于地方者。實心舉行。茲奉憲檄編審。與紳衿父老。公議興革。

力行均里均田之法。通盤打筭。每甲額田若干。務期
哀多益寡。不至此細彼盈。自夏徂秋。焚膏繼晷。田畝
參差。戶田增減。皆親自裁定。從無假手吏胥。並不稍
徇情面。今榜册告成。詳憲勒石。永定良規。不惟窮閭
免不均之憂。卽素封亦無偏重之累。豈止貽美利于
十年。或可垂善政於百世。倘有豪強。抗法專利而思
阻撓。孤鼠作奸。憑城而滋花詭。本縣盟心有素。執法
如山。月旦之口。易移。薑桂之性。不改。知我罪我不顧
亦不問也。其各凜遵。永垂無斁。

民事三 招復業

招歸善縣難民

嶺東李包閣 諱文輝 河南人

為招揀復業事。照得縣名歸善。善則可歸。爾邦既為
首善之地。此時又遇勸善之官。爾等不歸。更復何待。
聞此城向稱欣樂。今觀其氣象清新。風水靈勝。但房
宅損壞。須費綢繆。本道念切民依。恐此等基地。日久
無人。則為荒草湮沒。或成廢土。或報入官。殊為可惜。
昨本道親閱城郭。鞫若金湯。周視戶牖。尙堪經理。爾
民與其圖新。何如仍舊。為此示諭。各原主知悉。卽便
查照舊日基址。各自認識。稍稍葺治。便可安身。如或
一時難于創造。許爾民各刻草萊。豎畫原址。漸圖起

蓋但不得越過尺寸。致啓爭端。爾不侵人。人亦不敢
侵爾。此本道一片熱心。亦緩輯地方之亟務也。

民事四 勸開荒

勸諭開荒以廣農業事

邵陽顏孝敘 諱堯振 邑宰

照得農以力田爲本。業以廣植取饒。凡爾百姓。歲有
應納之官糧。日有必需之雜費。上自祭祀燕享。下及
衣食婚嫁。事事要行。節節難省。務期出多業廣。方能
取用裕如。今本邑荒田尚多。使富者能墾。則家道益
增。貧者能墾。則妻孥有靠。赤身者能墾。便可有室家。
以致富庶流寓者能墾。便可爲世業。以貽子孫。不費

半價而可得良田。陸續用工而又得蘆獲。從長計較。
開荒實爲上策。況今農事伊始。雨暘時若。正宜及時
開種。使秋成有望。千倉萬箱。舉家歡樂。此亦何等美
事。而甘蹉跎過日。豈本縣能爲爾百姓謀。在爾等百
姓。反不能爲一家謀。一身謀乎。爲此示諭四十二里
人等知悉。各相鼓勵。有力者獨耕多畝。無力者合本
同開。其有欲墾無本者。看同約正具呈。本縣借給牛
種。俱照例三年起課。仍給照帖。以杜爭端。如能墾踰
百畝。卽着呈報本縣。定行賞紅獎勵。并免雜差。是爾
百姓既得爲務本之良民。又得受官府之優待。如此

機會萬毋坐失轉相傳告以觀厥成

諮訪民情示

諷州喻念茲開東人

為開荒旨諭登頒田野荒蕪如故新任者不得其由畏墾者必非無故合行諮詢以便興行事照得開荒一事登奉明旨許以三年起科又奉各上臺憲示凡屬墾荒之民一概免其差役亦可謂有利無害難得易失之機會矣乃本州入境以來處處止馬縱觀其已經播種者皆係熟土而新墾之地甚是寥寥豈今鞠為茂草者盡屬槁壤石田難施胼胝之力者乎然必寸草不生一鋤難下始稱不毛之地未有蓬

蒿盈丈雜禾成群能產野粒以活禽畜不可備家穀以養人民者也本州睹此茂林豐草不勝為爾民歎息求其不墾之故必有一種苦情或畏開荒之初豪右見阻或慮墾熟之後故主出認或地頭里役人等需索雜費皆不可知至于農器耕牛本州自能措處給發小民何畏而不前為此出示諮訪爾民凡有難墾之情速來陳說本州忝為民牧自當為爾分憂

民事五 禁懸報開墾

禁懸報熟地

河南賈膠侯諱漢復

為嚴察懸報地畝以杜民累事照得此番清查地畝



本部院數經告誡。又委道官親詣勸諭。令民自首立無罪地。誠慮清丈之後。荒熟不清。隱漏難掩。彼時地既入官。仍要科罪。迨租窮簷。小民何以堪此。諄諄告誡。令有司共知。令百姓共見。不欲懸坐一畝之熟。亦不欲飾報一畝之荒。滿望豫屬州縣。遠邇共知。孰意近聞歸德所屬州縣。有熟地而從實首報。間有荒地而亦捏報成熟者。揣愚民之心。不過因向來舊則行糧。有二畝而折大地一畝者。有三四畝而折大地一畝者。恐欽差不允。照畝作算。貽患不小。殊不知各處地畝等則。大小原自不同。丈量繩尺。悉照舊行規

則。已經戶部題覆奉 旨允議。本部院先據邸抄。卽遵行所屬在案。爾民果荒為實。荒熟為實。熟合算不虧原額。卽欽差御史前來。未有不深悉民情。甘外等則。而別為吹求。以作強民之事。爾百姓何必皇皇過計若斯。第思此懸報之地。多不在紳衿。而在里民。里民何辜。而受此貽累。恐類此者。不獨歸德所屬為然。若不嚴行清查。民害何除。合行出示。確查為此。示仰撫屬州縣。併紳衿里民人等知悉。各將熟荒地畝。從實首報。各處成熟見在。實實若干。荒蕪見在。實實若干。合盤打算。既不虧額。又不累民。造冊申報。自無

後患。倘有司奉行不善。地仍有荒。而飾報全熟。強民
賠累者。該管道府。即指名揭報。以憑題叅治罪。若道
府不舉。爾被害之民。與其告辯於異日。何如具告於
今日。本部院即與除豁。斷不貽累。慎勿自相疑畏。甘
受包荒。自罹賠累之苦。貽本部院以不美之名。爾士
民其相信相諒。勿自貽悔。須至告示者。

禁懸坐開荒

河南賈膠侯諱漢復
巡撫

為嚴禁勒報地畝。以蘇殘黎事。照得中州百姓。連年
墾地固多。自十五年奉旨清察。自首季墾已經盡
報無餘。年來水旱頻仍。所收尚難糊口。又兼兩年並

徵小民輸辦。維艱切膚之患。尚顧不暇。豈有餘力再
事開墾。但恐不肖有司。謬循季報之例。圖邀紀錄之
功。不論開墾之有無。勒民強報。罔恤黔黎之疾苦。按
戶懸裁。又恐積蠹里書。借季報之名目。為索詐之由
頭。稍不遂意。暗捏地數入冊。斯時地方罹災甚多。斯
時百姓窮苦無告。倘官役不體民瘼。窮黎必至逃徙
則已。熟之地。將見復荒。安望久荒之地。復能成熟也。
一至民逃地荒之後。錢糧逋欠益多。各官考成尚難
免于叅罰。又安望紀錄之能律邀也。民累即是官累。
爾各有司。但未熟計耳。合行出示曉諭。為此示仰撫



屬官吏士民人等知悉。示後九鄉紳士民。果有新墾荒地。聽其自報入冊。若無新墾。季終回文。如敢違禁。勒民強報。或暗加懸裁。不論地之多寡。許被害之家。即赴本部院衙門據實陳告。該管印官。從重叅處。經承里書。鎖拿斃杖。決不輕貸。各宜凜遵。慎毋以身試法。

再禁勒報墾荒

賈膠侯

為開墾聽民自便。勒報大拂人情。嚴飭奉行各官。勿以邀功歛怨事。照得墾荒一案。關係考成。多則論功。少則註劣。此定法也。但邇來朝廷建一功格。有司

即增一。羶途有。司增一。羶途小民。即多一。死法。苟利功名。走之若鶩。雖斃數百家之生命。以自殉。所不顧也。如一聞錢糧全完。不論俸滿。即陞之例。各處有司。急圖陞轉。無不嚴刑酷比。多有斃民杖下者。一聞墾荒。叙績之例。各處有司。無不家櫛戶比。坐以荒田。勒使開墾。多有不顧怨謗者。獨不思爾要功名。百姓亦要性命。爾圖眼下富貴。百姓也圖日後平安。若以力不能墾之田。逼之使墾。姓名入冊。轉眼即是三年。萬一錢糧徵比不來。後官豈肯代為任過。則捏墾之罪。較之不墾。尤重求進。得退是由。擅苗使長。與宋人同。

轍也。合行嚴禁。云云

民事六 查隱漏地畝

察隱地

河南 賈膠侯 諱漢復 山西人

為嚴察隱地貽累大弊。以蘇偏苦以振法紀事。竊照曩者奉文清察地畝。一以釐欺隱之弊。一以清包荒之苦。原行甚明。鑿鑿在案。若州縣果履畝親丈。多者少者。當下立判。亦何小民受累至今。尚有偏苦不均之歎耶。近訪得前此躬親踏勘。從公冊報者固有。而以察地之責。專委里長鄉保。止據冊報。借手塞責者。儘多。以致豪強多種無糧之地。而小民反納無地之

糧所以然者。非里書戶房通同賄賣。即奉委鄉保畏惡徇隱如此。永害累及編氓。就有膏腴肥產。亦必力不能支。而況胼胝薄田。僅足糊口者。能保其常守故園。而不轉徙他所乎。為民上者。目擊此况。一味悠悠忽忽。而不一為振刷。不惟無國法。更無人心。本部院今已訪知。多種者。歷歷有人。徇縱者。比比而是。若不嚴察特參。民害何除。為此牌仰該司官吏。即便移文守巡等道。轉行各府州縣。大張告示。諭曉隱地者。盡數出首。包荒者。據實開陳。該州縣就將所首多種之地。均補賠累之家。若賠累人戶。有能舉報他人多

種地畝。審明得實。先補本人。餘及他戶。仍卽賞銀二十兩。該州縣果能大破情面。實心奉行。清出數多者。備造清冊申報。本部院定行破格題薦。從優議叙。否則情面是徇。因循如故。致豪強有地而無糧。小民有糧而無地。或被人告發。或本部院別有訪聞。先提里書戶房。立行處死。仍將漏稅豪強。與徇縱有司。一併叅處。概置重典。必不令奸貪得計。而使小民負累。莫伸也。

民事七 重鄉

選鄉約

淮揚漕撫蔡魁吾 諱士英 錦州人

爲慎選鄉約。以弘教化事。照得鄉約之設。彷彿古人間師黨正之義。俾其宣化于鄉。以佐政刑之不逮。任至隆法至善也。上之必年高有德。孝弟力行之賢。次亦必老成無過。端方正直之輩。俾之表率鄉閭。訓迪後進。善者有所興起。而不肖者有所嚴懼。其於化民成俗。良非淺鮮。本部院前在江右。極力舉行。今撫此土。自合加意。乃聞此地鄉約一途。盡失古意。或以衰殘。構數風。無懿美之稱。或以庸碌。具員每叢訾議之口。遂致匪人競進。以爲榮。高士鄙棄。而不屑。良法美意。漸滅盡矣。合行出示改革。爲此示仰撫屬各衙門

知悉此後選舉鄉約必期齒德俱尊行業無玷隆以體貌免其雜差地方之利病鄉約得而陳言之一鄉之善否鄉約得而舉報之賢良有司不時延訪詢民疾苦以便興利除害本部院巡歷所至亦將進而問俗觀風敷求至理庶先聖所云吾觀于鄉而知王道之易易乎其各實意奉行毋以虛文塞責文到各具遵依回覆

鐸書示

江西蔡魁吾錦州人

諭饒屬父老子弟知悉本部院撫茲江土承

聖天子仁愛斯民之意實欲先正俗而後行法先立

教而後明刑爾隳地素稱詩禮之區自變亂來流離凋敝斯民失其恒產者有之恒心或亦因之頓晦牧茲土者見民之日習于非也不得不繩以桁楊桎梏本部院念此無知之眾久失教化深堪哀矜但不先發其天良叮嚀勸戒遽施以敲扑民即苟免避法將益流於詐偽源未澄而欲清其流殊非致治之本則我有司與爾父老均宜分受其過語有云蓬生麻中不扶自直白沙在泥不染而黑民俗之善惡人心之淳薄豈不由於薰陶漸漬哉本部院視事之始即以行鄉約保甲為兢兢布告通省既有日矣愧力短心

長不能家諭戶曉所賴良有司體愛民之心行愛民之政以匡本部院所不逮惟爾饒之太守能懋勉力行擇立都綱首舉鄉約申明六言之旨更建社講學與士民覃敷文治教誨爾之子弟敦厚爾之族里此爾饒百姓之幸也爾百姓試思之今官府以禮讓教汝汝固得優游自如若以刑法繩汝汝安所措其手足耶苟或刁頑不格而從心背是則教之不改玉章必難輕貸一陷於罪惡大者誅殺小者鞭撻自罹法網全家離散又為衆人之所共棄求若此之協和仁愛雍容歌咏各享其父子妻孥之樂豈可得乎爾

等務傾心向化講鄉約卽思行此鄉約父勸其子兄勸其弟尊長勸其卑幼親朋勸其黨與期無負上官諄切至意使人共稱為仁里為德鄉本部院採風問俗必首嘉與此矣倘鄉約中有能實實化導一方者該府卽以具聞本部院給扁額旌榮之如有梗化亂教者本部院訪知立為爾地方剪除敗類決不姑息其慎遵毋忽

民事八

活保甲條諭

青州周櫟園謹亮丁
巡憲詳符人

照得保甲之設弭盜防奸原屬急務近來加以東人

藏匿如鬼如賊。一失覺察。下則地方隣佑。受其株連。上則州縣府道。受其叅罰貽害不小。勢不得不實力舉行。但人情樂于簡便。苦于煩擾。當時陽明王公。舉行此法。猶有謂其擾民無益。幸而州縣不真實奉行。者。何況後人。視陽明不啻霄壤。豈不願一味安靜。與民休息。但利害所在。較若觀火。行保甲則官民俱利。不行保甲則官民俱害。再四躊躇。欲求妥當。每見從來奉行此法者。往往不本實心。虛應故事。不過十家一牌。書寫名姓。官府經過掛之門首。官過則徽州縣官並未彙造成冊。即使造冊。亦絕不一寓目。不一關

活字人
誰為奇
予獨稱
確古來
無法不
活皆死
于不善
行法之
羊先生
能令死
者復活
証非醫
國手手

心雖遵奉上行刊刻成書。徒以供覆醬餽充廢紙之用。豈不可惜。甚至經年累月。只此一牌。並不查。並不換。真成故套。本道今行活保甲之法。但以十家言。經年之中。豈無遷移。來去。豈無死亡。增添。若不改註。詳明。終係格套。今令一一開載。某家自某處移來。某人向某處移去。某人已經病死。某家增添某人。務使底裏共知。行踪明白。則奸人自無所容身。而遇有勾提。按冊了然。不得指鹿為馬。致使李代桃僵矣。至于取結。不用衙役。止須各里見年。至縣帶投。查點不遺坐貳。必須印官躬親。簡從無擾。詳載後款。務在安

畢竟此
多彼少
前項仁
人十中
見一

民而已。顧州縣每每不肯力行者，其故有二。有一種人，真心愛民，以為清查既明，姓名在冊，萬一有東人干連，則兩隣甲長地方等無一得免者，不如含糊糊，猶有展辯出脫之地。此賢者之仁術也。其或不肖之人，借為騙端，指東那西，拘貧賣富，官府設陷阱以害民，吏胥張網羅而取利，小民何罪，一經牽連，有家破家有命喪命，窮其禍源，總由保甲不明，故拔引任意耳。倘能實心奉行，按冊跟究，則盜賊東人自難隱匿，自難容留，即賢者不必用其回護而不肖者亦無所肆其貪婪矣。爾等清夜自思，是為擾民為不擾民。

是為安靜，非為安靜。則本道一番熱腸苦心，亦可見諒于羣黎矣。所有事宜，開具于左。

一定保社長。從來行法，惟貴因民。若保甲之百家為保，十家為甲，此舊例也。各縣村庄不一，所有原設之社長地方，十家長俱如舊例，或輪充或常充，照舊仍管地方之事，本道不令更翻，但責成比前加重。凡各戶有人作非為之事，十家長鳴之社長，即酌量事之大小，如隣里言語不和，小事爭競，如牛馬踐踏，地土參差，一切小事，社長十家長可以處分消釋者，即為處分消釋，以免兩家爭訟，蓋告狀打官司，極是不好。

的事。一到縣中。卽寫狀一事。就用錢起。縣官准了。夢見承行。請喫酒。送出牌錢。發牌出來。就請差人送盤費錢。此原告之用錢也。差人到被告家。索酒飯。索差使錢。若事體畧大些。還說這張牌票。我用多少錢財。從衙內買出來的。我在書房。用多少本錢。纔差出的。不怕被告不打發。至于打點承行鋪堂。及用刑皂隸之類。一衙門之人。箇箇詐到。方得見官。官審之後。還要問罪。打板子。罰紙。罰穀。罰硝磺。罰修城。罰修學。罰修公署。許多名色。都要銀子上納。官司豈是容易打的。若是民風淳厚。各安本分。士農工商。不作非爲。何

用保甲。只因不學好的人多。所以設立保甲名色。全要保甲勸誨小民。使之相安無事。到勸解不開之時。方許報官。聽官法處治。凡各屬保甲之長。俱照舊充當。但本道把保甲長看得極重。看得極重。絕好把地方之事。責成在他身上。爾等原舊做保甲之人。當收心滌慮。從頭做起。保甲之名雖舊。而保甲所行之事。却要鼎新一番。

一嚴互結。彼此互相保結。則善良者各以類應。人自放心。同結。稍涉不端。人必不敢結。不敢結。卽以不敢結之故。稟官東人。無容身之地。奸尤之事。必敗矣。然

從來互結。就一家所居。左右爲兩隣。一家有無容隱匪人。取兩隣互結爲憑。東家之西。卽西家之東。但孤村市尾。或有左而無右。或有右而無左。或並左右皆無。則又格而難行。本道今立簡便互結之法。凡市集村落。或三五戶。共一紙互結。或七八戶。共一紙互結。結尾方書某等。各戶左隣某。右隣某。缺者止書貼隣。以便查叙次第。但不許過十戶。亦不許隔越間斷。須挨家逐戶。順去則耳目所及。見聞又便。爲好爲反。自不能瞞有無往來。人所共見。至孤庄獨村。或止一二家者。許于相近村隣。共爲互結。結狀交與地方。地方

轉交見年里長。繳縣存案。候查未到縣之先。中間有不入結者。地方明白報縣。爲何緣故。不敢入結。或令自新。或准親族公保。令其改過自新。此法一行。不惟從前奸宄無容足之地。向後外來之東人亦難再入矣。

一嚴連坐。東人必有窩主。兩隣十家長。地方其連坐之例。法已久行。但常有爲盜窩盜之人。起初未露形迹。地方隣佑人等。偶被遮瞞。悞經互結者。須立一格。許令于互結之後。具詞鳴縣。其呈云。爲報明某事。某等互結狀內。某人近日出入不測。或有面生可疑之

人來往。或于某日出往某處。計程幾日當回。至今過期不到。誠恐改行爲非。理合報明等情。此呈遞後。本人犯事。卽與互結人無干。但不許干事犯之日。臨期塘塞。至于出首東人。本道已定賞格。遠近悉知。此外如有爲盜窩盜等情。其互結之人。有能擒首到官者。審實賞銀十兩。卽以犯盜窩盜之家產克之。如此嚴行。則耳目旣廣。賞罰又嚴。必無以身試法者矣。

一禁騷擾。從來縣行保甲。書房出票。差人下鄉。酒飯之外。另有頭口錢。草料錢。造冊紙。張錢。寫冊工食錢。皆取之地方保長。地方保長。豈有餘錢代賠。勢必歛

之各戶。卽不指二科。十亦須倍二倍三。不雜出者。艱難斂者。亦覺繁瑣。是小民未受保甲之利。先受保甲之害矣。是以中格不行之。亦病其苦。且于月朔。遞結四鄉地方保長。必有往來之費。該縣查緝逃人盜賊。卽有查緝之費。差人取結。卽有取結之費。今與各屬印官約。本道亦從縣令起家。習知縣事。凡取各社各村鄉互結。不必差人。但以所出牌示。交與該地方。該地方交與見年里長。見年里長朝夕在鄉。催糧不時。赴縣比較。卽于比較之日。順帶結狀。投遞各戶。小民不走一里。不費一錢。故以取結之事。責成里長。自

無騷擾勒索之弊。外鄉互結既到。查其次序。謄錄成冊。卽申府道。存縣之冊。該縣自發紙價。毋累書役。累書役。卽所以累里民也。其申送府道之冊。應該紙價若干。府道自發。不累縣官。累縣官。卽所以累里民也。此冊已定。則各處村庄地名。及百姓兩隣人等之姓名。俱可一目了然。此後若有東人犯出。督捕行提某村某庄。逃入某窩家某。兩隣某。十家長某。地方某。該縣已先明白。及差役往拘。不過按圖而索。彼有何權。復能生端。索詐至于某處。報有盜劫。亦可按冊先查。察地方之稠密荒涼。以揣盜竊情景。兼可辨爲工賊。

外賊。若係別處行劫之賊。供報係該縣地方之人者。亦可按冊稽察。有無此名。冊上無名。則係假捏。冊上原有。則此人出外。何以在結。諸人不報。便可懲一警百。以杜將來。其有查緝東人盜賊。勢不得不差人下鄉者。該縣必須嚴行示禁。官不護役。役自不敢犯法。表正影直。百姓受其賜矣。

一編軍民。軍民原分文武管轄。如軍居軍屯。民居民庄。自應各立保甲。若以地界相連。或因佃種寄居。軍屯之內。有民戶雜處者。則民戶自應隨軍編派。民庄之內。有軍戶雜處者。亦應隨民編派。通行稽查。遇有

逃竊盜窩淫賭等項事發。乃分地方責成。蓋保甲之法。止就稽查逃人賊盜淫賭而言。非比僉派差徭。徵收錢糧。各有管轄。若軍民分為兩途。不惟有事之時。互相推諉。亦非畫一之法矣。

一禁擗法。十甲之法。其來已舊。今人所以視為故事者。皆以紳衿富豪。概求優免。翻來覆去。只查點貧民小戶耳。况窩東窩賊。開賭場。容娼妓。非大有勢力之人。卽窮兇亡賴之徒也。誰敢以身家性命。拚與此輩做冤家。故立法必自豪右。始或有投克宦戶者。未必不零星外居。此輩在一村。卽為一村之領袖。在一鄉。

卽為一鄉之主持。衙蠹結為腹心。無賴供其指使。每于立法之時。或倡異議。不使挨家順戶為結。或有不應入結之人。影名藉勢。壓伏隣佑。強之入結。或于既結之後。肆行不法。不容兩隣地方揭報。或已經揭報。至受官府懲創之後。不悔前非。生端報復。此等弊害。一有所犯。許地方指名赴告。官府審實。立繫杖下。斷不容其阻撓梗法。以為民害。

嚴查奸宄示

江寧別駕呂長木

講元長晉江人

為嚴飭保甲以靖地方事。照得本廳職司捕務。首在安民。故設立保甲。期于防盜詰奸。正所以安民也。乃

官欲安民而爾民不想自安有盜不防有奸不詰其為燕雀處堂殆至事發以後始來求救于官雖欲為焦頭爛額之人亦何及矣即今地中八所當字舖地方地廣人稠賢愚雜處聞有奸徒惡少類聚酗酒種種不法釀禍地方而該方總甲人等稽查懈怠既不驅逐又不報官夫賭博乃竊盜之階酗酒即為非之漸萬一迷人奸究溷蹟其中劫盜穿窬乘機竊發是誰之咎歟除一面密差嚴拿外合行禁飭為此示仰該地總甲人等知悉嗣後各宜小心查詰遇有前項匪人即赴本廳密稟以憑拿究敢有受賄容隱事發

一併連坐

嚴保甲示

河南李毅可 諱士 昌邑人

為保甲良法貴在實行詳請憲示以便清查以期成効事竊照保甲之設所以靖地方而察奸究法至善也乃有盜竊時聞逃人潛伏未見保甲公舉何人指摘何事其弊壞于印捕各官之未曾實行耳雖印捕莫不日言保甲人戶莫不日遵保甲言保甲者止于差催鄉長造冊了事遵保甲者止于置立門牌奉行故事竟使治世之良法襲為後世之虛文茲本司仰奉憲臺清理地方至意查訪府州縣守令皆不留心

承行不
的至今
占法蒙
不免有
益于公
亦且有
功千古

資治新書二集卷十三

重

林子園

盜賊之起皆為
番江富貴之家
以御論之當以
大戶為主編民
府之今使貧民
為富家守戶誰
肯甘心此古法
之所以不效也

保甲捕官力微亦不能行保甲紳衿貢監之家不論
壯丁多寡通不遵查入牌各衙門衙役匠作通不遵
查入牌卽間有入牌者亦通不遵令守宿不過一牌
之中三五赤貧菜傭聽其查照守宿而已不思保甲
原是里井守望共衛身家之策今富貴之家既不肯
効力協守而貧賤之流又豈能專心禦賊勞逸不公
人無銳志法雖設矣豈能收効茲欲實行保甲必當
委文武各官公同從頭清查務使家喻戶曉照例十
家仍編為一牌僻小村庄街道就將見在幾戶編為
一牌鄉紳舉貢生員本諱例不入牌其本戶子弟奴

僕壯丁俱入牌衙役入牌其家長子弟奴僕俱入牌
兵丁除營房內聽各營清查外其雜處民居者俱入
牌寺觀僧道俱入牌各戶婦女及男子六十以上十
五歲以下通免入牌人戶既清民心鼓舞稽察防守
便有根據嗣後鄉長鼓率甲長時常誥誡互相查詰
或甲內有不孝不弟酗酒賭博或遊手好閒不事生
產習非作耗及面生可疑或盜賊迷人等情甲長隣
佑卽公同舉報到官查究倘有通同窩隱事發一體
連坐使文武士民同心固志互相勸勉實實力行賊
盜自無容身地方漸次寧謐享無事之福非淺鮮矣

事關清查保甲事理。擬合詳請。伏候憲裁批示。庶便分委清查。仍刊示通行曉諭可也。謹將防守事宜開列于後。

一保甲以冊籍為憑。清查明白。印捕官各存一冊。鄉約鄉長社長。各處名雖不同。亦存一冊。官及鄉長各自備造。不許偏累。保長仍照例十戶編為一牌。其牌內有搬移去來人戶房主。須先知會甲長。甲長知會鄉長。鄉長即便登記。改正明白。每月初一日。總造一冊送官。照依稽查。改正。毋得因循錯亂。隱弊藏奸。查究未便。

一防守務在夜巡靜聽。凡盜賊行劫。皆乘不備。或幾牌之中。酌量地方街道。輪流每夜幾人。週圍傳籌。聞有賊警。即鳴鑼為號。合村齊集。救護擒拿。毋致滯脫。

一防守須置備器械。匪人自持兵仗。行克居民。豈能徒手禦敵。須每戶各備堅利器械。明註保甲冊內。以便查考。以防不虞。不許虛應故事。

一防守須修整柵欄。禁止夜行。定更之後。即便封鎖。其柵內富貴貧賤。一體酌派。輪流看守。如有官司及公差往來。看守之人。即細加盤詰。驗有印牌燈火憑據。方許開放。倘有一等克惡。強闖柵欄。肆行作踐者。



報官重究

一防守如柵欄已設。器械已備。夜巡有人。猶要聯絡救應。總要眾家齊心。倘一家有事。鑼聲所到之處。或鄉長甲長。帶領多人。分撥幾路。或防守本村。或飛集救護。或要路埋伏。或暗跟去向。或截賊歸路。有能擒活賊一名。為首者給賞大銀牌一面。綠紅一疋。給照免門面差二年。殺賊一名者。賞銀牌一面。給照免門差一年。倘有大功。臨時酌量加賞。如隣佑隣村。聞聲不速救護者。該地鄉長保長。公議作何行罰。作何責備。抗違不遵者。即稟官拿該地鄉長甲長。重責枷號。

示做。鄉村地方。如遇真賊。准放鎗炮。此後不許輕易鳴鑼放炮。如遇吉凶事。必預先告白隣村。方許暫用。

民事九 恤商民

禁官價

淮揚 蔡魁吾 諱士英

為嚴禁官價買物。以蘇商困事。照得官價剝民。取用行戶。為官方第一陋規。為俗吏最下行徑。夫取非其有名之曰。盜凡民。稍知自愛者。所不屑為也。不意位居民上者。偏屑為之。夫作朝廷命官。而與市井小民爭競刀錐之末。較量尺寸之微。其薄于自待。固無足論。不幾羞朝廷而辱衣冠之士哉。本部院下車之初。

資治新書二集卷十三

美

太子園

資治新書二集
卽行首先禁革。淮陰近地凜凜奉行。未有復肆漁獵者。但本部院時行審訪。備知維揚一帶。此風甚熾。不待緞舖諸商呈訴。而始悉其弊也。乃緞舖之困苦。爲尤甚。近時絲價高昂。數倍往昔。而蟒緞織金等物。其價更復不貲。常有官買一物。而行戶賠至數金。以至十數餘金者。况所用不止一疋。所取不止一官。商力幾何。其能堪此。更可憾者。官之谿壑易盈。役之饕餮難厭。或假公以濟私。或借一而冒十。試思出身加民。前程不薄。俸薪所入。儘足養廉。何至因此纖微。而買怨賈害。美利則蠹享之。惡名則已當之。愚而不才。未

有若此之甚者也。更有不發官票。徑行擅取。真假難辨。多寡無憑。不發則恐。或逢官怒。發之則疑。白被役侵。此中奸弊。更無窮極。至於公館舖設。奉旨禁革。是何衙門。敢復巧取。以上種種。貪暴陋規。合行禁飭。爲此示仰。各該衙門。官吏人等。知悉。此後一切日用諸物。俱照民間時價。公平交易。敢有復持一。復遣一差。有所取用。或致短少。以至假舖設。借用等名色。及無票口取等項。許諸受害舖戶。或赴本院。告理或扭稟所在官司。以憑轉報施行。官叅役處。決不姑貸。

恤商民

山西巡撫 賈文侯 諱漢復 山西人

為嚴禁科累行戶。以恤商民事。照得士人一行。作吏食祿于官。卽宜吾鼎自愛。勿競刀錐之末。勿效市井之為。非特大體宜然。卽此規模之小。大覘其品行之高卑。與前程之遠近。從未有見小利而能成大事者也。本部院歷任中外。剔歷有年。從未知以官票索取一物。此遠近行戶所共知。自入秦疆以來。凡日用米麵蔬薪等項。登註紅簿。現給紋值。較之平價。寧浮無短。且素性澹泊。不以口腹累人。所用一切器皿。俱從儉約。幾與太古同風。本部院躬行若此。庶爾其事諸

員應有同志。乃近訪撫屬各衙門。頗尚奢靡。不崇節儉。且其慷慨自奉者。又多不費已囊。強半出于民力。動發官票擾民。濫用行戶支應。舞文胥役。指少派多。畏法閭閻。將無作有。及至遷延歲月之久。所發價值多與蠹役中分。甚至有候領無期。分文不給者。復有換潮銀。鉛多錫少。名為全給。而實不得其半者。種種情實。實難枚舉。是何異于禦人國門之外者乎。獨不思商民挾持資本。背井離鄉。不過冀覓蠅頭小利。豈意終年奔走。祇為貪污作馬牛。名為官取實同盜劫。興言及此。殊覺痛心。合行嚴飭。為此示仰撫屬大

小各衙門知悉。嗣後務宜洗腸滌胃。革舊從新。勿為壟斷之渠魁。勿作商民之大盜。勿取他人之物。而自鳴慷慨。勿以口腹之累。而致悞功名。凡日用諸物。俱照本部院所發足色紋銀。照依時價平買。不許仍立行戶官價等名色。擅出硃票。虧短價值。倘有仍前見小昧大。陽奉陰違者。商民有口。斷難掩飾。本部院一有見聞。輒登白簡。功令森嚴。勿以身家嘗試可也。

除行戶

漢中 司李 曾道扶 嘉興人 諱王孫

為嚴除行戶。請憲勒石永禁。以甦殘黎。事竊照秦地貧苦。民生陘隘。由來舊矣。漢南困阨。較他屬為尤甚。

流移接踵。皮骨僅存。呼號無路。今者重兵南徙。休息可期。力農作苦。已安耕田鑿井之常。而市井閭閻。反有日衰之勢。則以行戶之累未除也。夫行戶之所苦者。一曰取用。二曰借用。取用者。空票支取。另立官價。候領無期。兼多扣除。即能給發。不及什五。借用者。齎物伺候。既稽時日。及至領歸。遺失更多。雖云補價。不過口惠。甚至四境不產者。逼其轉買。登臨難至者。督其搬運。行商失業。坐賈破家。家愁巷戚。比比而是。所山然者。蓋緣兵興以來。供應稠疊。相沿成習。勢不能



禁。今漢中文武大小衙門。不及十處。咸荷地方之責。均有恤民之心。顧此殘黎。呻吟未息。誠不忍以行戶重累小民。况煌煌憲禁。凜遵已久。但及今不更加申飭。昭示來茲。則從前積弊。恐絕而復續。今據某等連名呈請。本廳竊謂官之于民。猶父母之于子。子方顛連。為父母者。必求所以安全之。不能安全。而反加困苦。安用此父母者。為今漢中之民。亦極顛連矣。裁革行戶。誠安全之一端也。請自今以後。文武大小各衙門。一切服食器具。俱令現銀平價易買。不許另立官價。短少時值。至公私宴會。俱自辦用。不許着行戶安

置鋪設及借用各項等物。其行戶名色。一概革除。如有仍蹈前弊者。或係訪聞。或經告發。許不時揭報。立賜叅處。仍乞嚴飭漢中各屬。勒石永禁。則閩南赤子。有更生之望矣。

諭行戶

甘肅 巡撫劉耀徽 寶定人

為申飭行價。以蘇商困事。照得本院撫綏兩河。駐節涼城。無論是商是民。皆吾赤子。自下車以來。目擊地方窮苦。時時軫恤在懷。期登豐裕。近察得本院衙門。一應買辦簿內。取用各物。雖見發銀兩。毫不虧欠。其間開註價銀。俱較時值短少。循倣從前陋規。名曰官

價。但貨物消長不定。價自隨時低昂。豈可官買一價。而民買又一價也。况爾等商賈。資本微薄。經年累月。跋涉艱辛。所獲蠅利。能有幾何。而可堪此時累乎。合行出示申飭。為示仰各行戶人等知悉。自後凡本部院衙門。一應簿內註買各物。俱依時值市價。于所買物件之下。許行戶親筆開註銀錢若干。以便如數給發。如有買辦人役。執筆硬填。乘機冒破。以至多開少給。扣剋肥己者。查出定行重處不貸。

諭行戶

鞏昌
太守白九峯
山西人

本縣下車一月。商賈浸浸平日來街市。改寂為喧。貨

物從無而有。頗為邑人稱慶。但恐衙官不能久守吾禁。又恐買辦各役私賒私騙。勢必復驅而去之。故再示行戶。凡有此項。不時喊稟。拏究不貸。

懸鑼察弊事

衡州
司李王望如
諱仕雲
江寧人

為申明嚴禁。濫取行戶事。照得撫部軫念行戶。嚴禁濫取。已經大張曉諭。又命本廳刊刻小票。分給各鋪懸掛于門。法至善也。豈期衙門吏胥。奉公守法者雖多。而陽奉陰違者不少。嗟此商賈。其何以堪。堂堂憲示。等于弁髦。成何法紀。今本廳專為此事。特于大門之外。設有銅鑼一面。爾行戶人等。遇有各衙門人役。資台所書二集卷十三

擅取物件者。卽刻赴廳鳴鑼。隨將各役申解撫部。輕則懲處本役。重則題參本官。特示。

民事十節土豪

禁飭土豪

霸易 張壺陽 高平人 巡撫

為嚴禁土豪。以安良善事。照得地方大害。除貪官汚吏之外。卽屬地棍土豪。蓋因此輩奸徒。雖立衙門之外。實能陰竊官吏之權。巧逢貪污之意。伺其嗜好之所在。或以急公奉上為名。或以頌德建碑為餌。後良民之膏血。獻若輩之慙。慙官吏一墮術中小民難逃網外。由此而武斷鄉曲。以肆咆哮。橫行城市。以鳴無

懼。小則起詞滅訟。操縱得以自如。大則窩竊賣訪。身家在其掌握。小民含冤而不敢訴。卽經控告。而線索有靈。未有不引火自焚。而注水加溺者。故此輩一日不除。良民一日不能安業。本道奉三尺撫循。茲土豺狼。固所當除。而狐狸亦須急問。為此示仰道屬士民人等知悉。凡有前項兇徒。怙惡不悛。仍前作威作福。殘害善良者。許被害人等。不時抱牌控告。以憑盡法重處。倘該管有司。不能覺察。而揭報于前。以致被人告發。而審實于後者。卽為若輩穿鼻之人。定以養惡縱奸。一併揭究。各宜猛省。勿致自誤。



民事十一 庶務

嚴禁違 旨背律等事

青州 周揆園 諱亮公 巡憲 祥符人

照得典舖之設原卽有無相通緩急相濟之遺意爲法甚善本道宦轍所至閱歷頗多大約大典取利不過分半及二分而止卽小當亦利不過三分贖必按月滿月之後再踰五日方作兩月算卽踰四日仍算一月此天下之通例也獨爾青州不然利則四分以至六七分甚有至八分者更于票上不寫月息若干以便恣意橫索及于取贖之期限更爲迫促辟如此月二十五日來當至下月初五來贖不過十日耳輒

以前月之五日作一月復以後月之五日作一月十日之內而收人兩月利錢又皆八分起息此較明火執仗劫掠取財者豈有兩樣爾等試思爾雖富足豈能常富人雖貧窮未必常窮何不趁此家計殷實做些好事貽爾子孫何故貪取一時重利斂取衆怨令人敢怒而不敢言爾看世上做經商買賣之人那箇不起早睡晚登山涉水衝寒冒暑旣憂消折復畏盜賊但得三分利息安穩到家卽父子妻孥舉家歡慶矣獨爾等不須奔走道路不必拋棄眷屬不必侵犯霜露不意外驚恐不憂絲毫折耗安安穩穩高坐

在家收享成利。已是萬分得計。何苦更作此利。已損
人之事。爾看苛取重利之典舖。後來子孫幾箇得昌
盛的。况放債取利。不許過三分。久奉 嚴旨申飭。而
大清律內開載。凡典當財物。每月取利。並不得過三
分。重者坐贓論罪。誰敢不遵。白干法網。爾輩之得
以藉口者。有二。曰辦納 國課也。曰答應官府也。爾
等試思 國課幾何。每年不過五兩耳。凡開當舖者。
多則盈萬。少則數千。今以五兩交 國課。以三分起
息計之。不過費爾十五兩本錢之利耳。于爾何損。辟
如買田一頃。所收不過百石。初寒暑雨。男耕女饁。受

忍亦未
必官官
如此

盡多少辛勤。自交納錢糧而外。所存有幾。一遇水旱。
卽顆粒無收。誰敢不變產完課。試與爾輩較之。誰逸
誰勞。誰豐誰嗇。至于答應官府。從前陋規。原可痛恨。
然未必官官如此。本道自下車以來。一年有餘。曾取
當舖中一絲一紵否。曾借用當舖中一件什物否。本
道既自審無愧。便可推己及人。我今爲爾等嚴禁所
屬。不許沿習舊規。取用一物。仍請之兩臺勒石永禁。
則爾輩可以無累。亦不得藉口累人矣。乃又有一事。
不便于爾輩者。曰當錢錢價自有一定。無奈奸民。往
往變紅低昂。假如當出去時。時價一兩一串。及取贖

時。奸民或低爲八錢一串。或七錢一串。取贖之時。錢數既不便加增。錢本遂不免虧損。此爾輩之所以通盤打算。借重利以補微耗也。今亦爲爾等立法。凡當錢時。卽于票上寫明。照時值銀若干。俟來贖時。但照出當之原價。不照取贖之時值。則此項虧損之病去矣。爾輩旣除其害。復去其病。便當取出良心。各做公道生涯。勿作欺天勾當。自出示之後。止許三分起息。不得加增毫釐。按日計月。不得任意那償。本道不時採訪。如有不遵。立拿重究。決不姑貸。其有見示之後。收舖不開。或虛開舖面。以無銀可當爲辭者。此等皆

係奸徒。本道不時訪出。一體懲究。其已前當過之物。自今日以後來贖者。亦只許索三分之利。不許多索。分文總之本道。身在地方。富民貧民。皆吾赤子。豈忍偏枯。興利除害。出自本心。豈容姑息。爾輩若欲享利。先須避害。急急警醒。勿貽後悔。

禁違例放債

開西李含馨
守憲 潘陽人

照得鳳屬兵燹之餘。百姓豈能家給人足。借債放債。情出通融。于理亦無妨害。然銀一兩。爲利不過三分。穀一石。爲利不過三升。要使與者受者。各得其平。斯爲天理良心之至當。本道下車以來。訪得有等貪詐

之徒借放債為名而遂其魚肉鄉民之實。加一加二利上盤利。年終合算。數倍有餘。是子大于母。而指浮于臂矣。有是理乎。窮民無力償還。卽折其子女。準其房產。豈止惡浮於虎狼。亦且行同于賊盜。爾等試思放債圖利。無非為身家子孫計耳。如此忍心害理。刻剝成家。他日子孫豈能常享其福。本道意在易俗移風。不得不先為告誡。合行出示。禁諭。為此示仰一切軍民人等知悉。以後借借放債。上以三分起息為準。放者不得苛索。于外借者不得虧損。于中如有貪怙不悛。仍蹈前轍者。一經告發。罪有所歸。要知貪卽致

貧之由。而利乃叢害之藪也。慎之誠之。

民事補戶口

蠲豁亡丁示

江西巡撫蔡魁諱士英 錦州人

為編審事。為照編審人丁。計口出賦。未有不求足額者。本部院念江省編戶。叠遭兵燹。鋒鏑逃亡。約去過半。目擊心傷。不忍以缺額之丁口。重累見在之子遺。代為賠納。故據缺扣。減特疏為爾百姓請。命業蒙

內部議覆

皇上洪恩。俞允。照數蠲豁。計免通省男婦。共五十九萬四千九百有零。除經行令藩司。轉行所屬遵照外。

資治新書二集 卷十三

庚

林

合再出示曉諭
逃亡老弱丁口俱各遵奉
皇恩浩蕩母負本部院於恤至意敢有奸胥豪里不
為除筭槩行混徵者許諸色人等據實指名首告以
憑拿究不貸

斬放火克犯後曉諭軍民示

為曉諭事照得康熙十年五六月間二戶長龔二等
身帶火器乘機放火燒燬居民房屋希圖搶劫資財
當獲審實定擬斬罪詳院具題部覆奉旨依擬監

江南陳司貞
諱秉直
海城人

三十
年來
南第
快事
公不
為之

江寧
火
災
不
過

候在案值今秋審因其情罪重大本司會詳應決蒙
督撫部院會題奉旨准到部咨于本月二十一日
牌行到司隨行該府將龔二左大王二等押赴市曹
處斬訖查刑人于市與眾共棄理合示知為此示仰
軍民諸色人等知悉奸宄伏誅諒輿情之共快羣兇
駢首昭國法之無私從此惡人胆落務宜革面革
心良善安生永保無咎無災之福矣特示

禁搶火示

江南陳司貞
諱秉直
海城人

為嚴禁藉火搶奪以昭國法事照得居民失火本
係天災當此之時烈焰飛騰心胆碎裂屋既付之灰

資台新書二集卷十三

卷十三

獨第一
發公尚
軫念民
生若此
劫杭城
為風火
不絕之
鄉公
處得為
之地乎
救民水
火之中
善知不
遺餘力
哭

燼所有衣囊什物尚可搬移寄頓留資一線餘生是
以倉皇失措取東棄西顧此忘彼此等急狀苦情本
司無不深悉乃有一等極惡奸徒非但不肯救援又
且幸災樂禍乘機奪搶如此巨惡蛇蝎為心比盜猶
甚合行嚴禁為此示仰百姓人等知悉嗣後設有火
災本司即令南北二捕官及上江二縣親行督救四
圍巡視使爾百姓從容搬運如有前項奸徒乘機搶
奪者當即立拿追究以放火搶劫之大辟罪之龔二
左大等榜樣具在駢斬于市共睹共聞非止空言恐
嚇而已也爾百姓亦宜協力擒拿無使免脫特示

誠諭出洋愚民示

江南陳司貞
諱乘直
海城人

為愚民射利出洋貪癡罹法曉諭喚醒事照得爾商
民持本貿易離鄉背井棄父母拋妻子止不過為肥
家計耳然何地不可往來何省不可貿易而必欲冒
險出洋甘心罹法乎且人窮通有命不可強求如命
運亨通雖本少貨微就近興販一朝奏遇亦能發積
如命運不通雖百計營求非遭風覆舟即遇盜被劫
何況違禁偷渡乘舟于汪洋大海之中一旦被獲自
蹈于傾家隕命之罪乎本司蒞任方及一載而審閱
洋犯不下數起其中雖有被誣妄拿之案而人貨兩
資治新書二集卷十三

資治新書二集卷十三

三

三

獲者如俞黑子。方景之張老五。楊子元。唐大。秦元等。審勘之時。亦有本省愚民。亦有各省貧賈。皆係貪嗔亡命之徒。代為爾等思之。厚利既不能獲。而身首喪于異鄉。父母妻子。今生不能團聚。仍將家財查沒入官。甚為汝等追悔。甚為汝等憐惜。然本司雖有惻然之心。其如國法森嚴。不能為汝等寬宥。惟有勸勉喚醒。以杜將來。毋致愚民再罹重法。為此示仰百姓商賈人等。知悉。務須仰遵本司苦口之言。各安本分生理。不得貪癡妄作。再想出洋。以致身家莫保。云云。猛醒。須至示者。

靈隱禁約示

錢塘梁治涓 嶺允植 邑宰 真定人

照得靈隱寺。肇自赤烏之歲。雙樹依然。傳來白社之宗。五花相繼。化城不遠。轉金粟于闍浮。鷲嶺非遙。通璇宮于法累。此誠清淨道場。自合莊嚴整肅。遊聞有等寺房。緇流不思五戒。時犯六條。逐逐檀郵。妄希佛面之金。耽耽善信。不飽如來之粟。雖累蒙憲禁。仍借募化名色。混擾大殿。不思沿門乞食。祇堪舍衛城中。徧地鋪金。只合給孤園裏和尚之沾泥。帶絮。莫此為癡法席之托鉢。林瓢方之較甚。除現奉署臬憲糧道劉嚴飭外。為此合再示仰本寺方丈。勒石永禁。如有

前項僧徒貪心不改更亂清規許禪堂住持指名赴稟以憑拿解各憲究治驅逐不貸

資治新書二集卷之十四目次

告示部

荒政一 救災

捕蝗示

捕虎示

僱船救難民

荒政二 賑饑

賑粥示

寒月賑貧示

賑養難民示

擬作

王介公

王憲章

姚綏蕃

徐德夫

高寓公

資治新書二集卷之十四目

木子

分別周給等事

林武陵

保恤災黎示

佟壽民

荒政三 疏海禁

諭瓊州兵民

盧山斗

荒政四 禁販人口

禁別省奸民販賣人口

盧山斗

禁買饑民子女

姚繼菴

荒政五 勸州貧佃

救荒第二示

顧南樓

荒政六 禁索私債

救荒第一示

顧南樓

荒政七 祈晴禱雨

祈雨示

姚繼菴

祈求雨澤事

蔡魁吾

荒政八 勸民修省弭災

勸諭士民齋戒

顧南樓

風俗一 禁尚奢靡

禁娼館

周文夏

風俗二 禁止遊觀

綳繆未兩事

胡掌綸

風俗三 禁尙邪教

賈膠侯

辟邪教

風俗四 禁賭博

李含馨

禁賭博示

風俗五 誠輕生

俞視如

立法勸諭等事

顧高

勸諭愚民等事

風俗六 勸埋柩

黃

募勸掩骨瘞骸

風俗七 禁質女

姚綖菴

禁典妻女

風俗八 禁錮婢

羅鏡菴

禁止錮婢不婚等事

風俗九 禁造訛言

李包閣

諭惠潮二屬

風俗十 禁屠牛犬

袁蒙匪

通行各屬牌

修孚六

嚴禁私宰

顧南樓

嚴禁宰牛

告示 新增

禁剪竊示 以下入風俗十

陳司貞

禁喇棍叫好

禁宰耕牛 入風俗十

梁洽湄

禁把持婚喪

陳司貞

禁破喪勒詐

禁置棍打降

陳司貞

資治新書二集卷之十四

湖上笠翁李

漁蒐輯

婿沈心友伯訂

荒政一 救災

捕蝗示

擬作

照得本府居官不職致令蝗旱為災除齋沐虔禱作
文以告上帝求速賜異常時雨陰辟蟲患外今查往
古載籍但遇蝗蝻為崇祈禱不滅即行捕除本府切
禱鬼神已經半月不見其少反覺滋多是蝗神不忍
自滅其種而欲假手干人也已經申請各上臺准以
常平義倉所貯米麥散為捕蝗之資許爾民不論男
貧治新書二集卷十四

芥子園

婦長幼有能捕蝗一斗者給糧一升。是以賑饑恤貧之意。卽萬千救災捍患之中。旣爲爾民除害。復爲爾民療饑。想亦人人樂從。而奔趨恐後者也。今將捕蝗法則條列于左。其各遵行無忽。

計開

一蝗在麥田禾稼深草中者。每日侵晨。盡聚草稍。食露體重。不能飛躍。宜用笊箕掃帚之類。左右抄掠。傾入布袋。或蒸或焙。或澆以沸湯。或掘坑焚火。傾入其中。若只瘞埋。隔宿多能穴地而出。不可不知。

一蝗最難死。初生如蟻之時。若用竹木器攻擊。非惟

不斃。且易損田禾。莫若用舊皮鞋底。或草鞋舊鞋之類。蹲地摑搭。卽應手而斃。且皮底爲物狹小。不損苗稼。

一蝗有在平地者。卽于曠野掘坑。宜長宜濶。兩旁用板及門扇接連。八字鋪擺。衆人手執木枝發喊趕逐。驅之人坑。又於對坑用掃帚十數把。俟有跳躍而上者。復掃之使下。覆以乾草發火焚之。先燃列火於坑。然後趕入。詩經所謂秉畀炎火是也。古人亦知瘞埋。可以復出。故以火治之事。不師古。鮮克有濟。誠哉是言。

捕虎示

福建王介公諱道新

照得某縣狼虎甚多。各處傷人深可憫恤。村民不肯撲滅。皆因營弁衙役交相勒取皮骨等項。使民畏人甚於畏虎。任其流毒。歛手坐視。合行嚴禁。為此票仰本縣官吏文到。即便曉諭百姓。遇有虎狼。務要奮勇撲滅。如有營弁衙役勒索皮骨者。許捉虎之人。赴道陳告。定行申究。

僱船救難民

和州王憲章諱執中

為捐俸買舟。急救難民事。照得洪水為災。民房漂沒。此係非常天變。本廳正切杞人之憂。恐巨浸之為害。

王君一川作耳。聞其風。裁異常。不畏強。禦且能。判事如。神民皆。謳頌予。揭此示。示人見。服官無。論大小。但有善。政即傳。

當不止于此也。頃聞地方報呈。知片刻之間。水長數尺。城外男婦小兒。現有漂去無踪者。則轉瞬之間。又不知作何狀矣。遇此非常大難。而不急為援手。何以官為。但思救民水中。必需船隻。船隻若待出票催拿。勢必遷延。時刻待船。隻拿齊之後。民已溺死無算矣。今本廳除捐俸之外。復典衣裘。換得制錢若干萬。照民僱雇。募不減分文。爾船戶人等。有願得現錢兼做好事者。速來領價。如飛往救難民。務須盡心竭力。放出生平手段。來救活一人。爾有一分陰功。勿作尋常生意。做如有衙役人等。當堂給發現錢。背後索分使。



用者許爾等大聲喊稟以憑重究不貸
荒政二賑饑

賑粥示

瓊州姚綏菴江陵人

上矣其道黎民阻饑不但米石玉金卽今榔椰各樹
尖芽摘食殆盡嗟我瓊民其何能予遺耶此皆救民
者之罪也本廳力請于上多方募助得米若干石可
克二千人兩月有半之粥自今日始設廠晏公廟傍
前後置密柵柵內廚房六間官蓬三間沿柵置鹿角
欄杆雨蓬周匝欄內置大水缸數十口盛粥欄外站
立饑民欄上雜置鹽菜等物先一日本廳親自驗米

給做工人次日黎明煮粥辰刻擊鑼一回本廳到廠
饑民齊集廟前本廳親驗其中有瞽者跛者病者老
不能健行者皆坐廟外本廳親督各役先給四頭人
各粥二升鉢具官脩少壯男女皆進廟中四頭去訖
擊鑼二回本廳親詣廟前點名給籤先女後男人持
一籤本廳復回廠中手執瓢杓督同各役隔欄給粥
人各二升小兒懷抱各給一升鉢具官脩籤盡照前
再散鹽菜任意取食散訖擊鑼三回本廳歸署本廳
每日初到謁神四拜向饑民八叩首散訖再向饑民
八叩首以謝不職之愆也廟內多焚香肅防疫氣也

數項內
無大不
該無微
不悉使
公得宰
天下有
如是粥

先散老癯罷疾懼擠跌也。做工人。即用饑民食力使
也。自本廳下至門皂輿夫皆不許別帶飲食。即用
水釘內剩粥。期潔淨不致米糙污穢也。小兒懷抱人
給一升。彼利在粥不鬻子也。有餘方給獄囚。先無罪
後有罪也。凡生員暨少婦處女。一次後。即逐日照粥。
給米不冷。再赴廠。尊斯文。養廉恥。不欲以一日之饑
屑衣冠之體。決內外之防也。嚴禁兵丁及商旅閒人
不許入廠。慮其誘我饑民鬻子女。使仇離也。在遠未
即到者。分差各役持米迎之。在途未即到者。持粥迎
之。願守家者。量給米付之。其婦子道路與斃于室隅

却此經
完賑事
且見實
心

從來難
已多屬
膚言此
獨按肝
瀝髓

者庶幾寡矣。麥秋將至。量道里遠近。各分米作路食。
遺之行百里者。半九十兩月之粥。不能達數日之程。
猶之乎未生也。吁嗟乎。為人上者。先之不能。變理災
疹。俾無水旱饑饉。次之不能。薄歛省徭。使民婦子相
養。迺至無食。顛連携扶。老弱奔走。道路沾糜。糊腹
而溢。甲千百為群。擁擠踏側。為人上者。自顧清夜。何
以為心。雖使兩月有餘。同飽缸中之粥。其噉欄頭之
鹽。為人上者。亦愧死矣。尚何顏以對此千百之饑民。
哉爾。饑民姑相與寬。此賑廠一官。俾汗顏而終此事。
則幸之幸也。謹示。

資台新書二集 卷十四 五

寒月賑貧示

江寧太守 徐德夫 謹啟

為查賑貧民事。照得本府每出街衢。見有殘疾男婦。呼天乞食。當此寒月。意甚憐之。又有一種。蓋禮之人。並無殘疾。原是漢子。儘可營生。作活而甘心。為此等乞憐之人。此時甘為乞憐之人。將來必做不良之事。又聞有等強硬花子。結幫成羣。動向開店人家。預錢勒索。此即強盜之流。互也。本府以為人牧。無告者。不忍無賴者。難恕。已經行令上元縣主簿。逐坊備查。攢造花名到府。除原係飯堂食糧者。既沾皇恩。誼無重賑。聽其乞食。姑不禁治。其無疾漢子。不務生理。不足

憫恤亦不賑外。止有無糧。殘疾貧民。本府雖當新任。設處最難。而親見其苦。安忍坐視。偶江寧縣解到條。給倉米。似可暫借。以待異日設法補還。除一面行文。着令堆放寬廠處所外。為此示仰後開貧民。俱限某日午時。各携小袋。齊集貢院內聽候。本府親臨給賑。聊過寒月。其無名者。不許混擾。如有前項撒賴奸徒。處于丐盜之間者。許被害。扭赴本府。從重責治。

賑養難民示

寶坻縣令 高寓公 謹啟

照得本縣屢次往劫敵營。救出難民。難婦若干名。口除屬境內者。俱給帖發歸本里外。其在別府州縣及

山東府屬者必俟敵退解嚴津溢無阻始可遣發還鄉昨已安插空房寺院等處諭令暫居今恐天氣漸暑鬱蒸致疾不但預籌賑養之資兼為曲防災疫之計先令食粥三日然後煮飯蓋恐久饑之人反以驟飽致疾也其煮粥煮飯煮菜悉取舊鍋備用萬一不足即將新鍋向民間換取舊者若以未經炊爨之鍋煮粥備賑饑民食之未有不立斃者人命重大爾衙門值事人等悉體本縣好生之意恪恭辦事勿以草率懶惰而害生民其有染疾抱患者即報本縣以便撥醫給藥調治總期為人為徹必至生還而後已也

分別周急以彰優禮事

泰安 刺史 林武陵 江寧人

照得告賑諸生螢燈苦志雪案埋頭子夜青燈會見絕編研露丁年黃卷未獲衣錦拂雲既無負郭之田難免懸鵲之結雖斷蠶畫粥菜羹滋味堪嘗而雀食鼠根袖底清風難買當茲歲歉兼值年終恒念床頭金盡壯士無顏詎不瓶之罄矣室人交謫本縣優禮斯文觸處動念豈當賑濟使爾慳子自後諸生不必同饑民領穀但赴儒學報名以憑照冊發賑務與齊民有別恭維鶴原不同羣駑驥各容其棧今汲西江以活鮒庶使點額之顏不淪菜色後破巨浪以駕鯨

幸將剝膚之痛轉念苔華特示

資治新書二集卷十四

諭瓊州兵民

廣東總督 盧山斗 謹崇峻

為便宜救荒以全一郡生靈事照得粵東自禁海之後商販船隻久矣不通功令如此誰敢隕越但今瓊州一府孤懸海外去歲連遭颶風霪雨禾苗豆黍盡皆漂沒民不聊生又以海禁森嚴不敢出疆告糴合郡兵民向則嗷嗷待哺今且懍懍待斃矣該地鎮道等官各以時事可危紛紛代為請命又且情詞迫切非口且夕不能苟延即日死亡今已叠見本部院

事與汲
長謠同
而漢文
之中少
此一篇
絕暢文
字豈非
缺典

批閱至此不覺寒心兵民飢困若是而不早為區處直待臨危告急非地方文武之過而誰過歟當斯時也倘束手禁海之功令坐視萬姓之危亡為民上者固不當有此忍心害理之事即使飛章入告請與疏通而粵東去京八千餘里若非經時纍月豈能獲見 綸音竊恐候至彼時雖有救荒之粟民不得而食之矣然而航海有禁賈盜可變未經請 旨而遽為開釋矯 詔之罪萬萬難逃是兵民安則本部院危本部院安則兵民危矣與其危數十萬之生命暗削邦本之可憂不若危本部院一人明示 國法孝

資治新書二集卷十四

八

芥子園

精忠卓識並絕千古謂盧山斗先生不與汲長孺並傳信也

為得也。昨已會同巡撫提督從長計議。幸與本部院綽有同心。今許爾等于瓊州界內航海而來。本部院給與批文。向米價稍平之處。適行告糴。但須該鎮道估計人口。自某月某日為始。算到新穀登場之日為止。約用糧米若干石。無使不足。亦勿令有餘。填定數目。具由前來。方准照數收買。數外不許濫溢。買完之日。仍將船隻編定號數。委的當官兵押送過海。該鎮道照數點收。查無缺少。船隻方與兵民領去。如有假借救饑名色。將米糧運出界外。接濟賊航者。查訪得實。該地兵民與護送官兵及船戶水手人等。不分首

從一例處斬。今本部院一面開羅。一面具疏上聞。自陳愚鹵擅便之罪。靜候

皇

上處分矣。昔汲黯矯制開倉。見亮于漢之武帝。今本部院才術短淺。雖出汲黯之下。而我

皇

上仁慈愷悌。則更出漢武帝上或者幸叨恩宥。亦未可知。爾兵民人等各遂所天。無為本部院過慮可也。特示。

荒政四 禁販人口

禁別省奸民販買人口

廣東總督盧山斗諱崇峻

為嚴禁販賣人口。以圖生聚事。照得粵東一省自海

氛不靖以來。文子流離。夫妻拆散者。不可勝數。其間有通海窩賊。自陷身家。以致官兵搜勦。捕獲入官者。此等孽由自作。無可矜憐。外此則飢寒自嚙者有之。營債逼售者有之。錢糧迫棄者有之。詞訟陷賣者有之。近又爲遷海失業。無計資生。以致夫賣其妻。父鬻其女。棄骨肉以延殘喘。忍耻辱而救夫親者。其顛連困苦之情。尤可憫惻。然使以粵東婦女。仍賣粵東。此時雖暫拋離。猶望于否極泰來之後。或有珠還鏡合之時。即使不能尙可希圖見面。不致音耗難聞。一入于販賣奸徒之手。則天南地北。任其所之。況有貪圖

重價。逼賣爲娼。而婦女忍辱不甘。以致投河自縊者。比比而是。是女子越境卽爲生死榮辱之關。凡有保民之責者。不可不加嚴而致慎也。况閩隘稽查不密。卽多拐騙之徒。地方盤詰失嚴。必來窩圍之輩。是官長不究與販卽招拐招騙之媒也。合行揭示。藉諭爲此。示仰督屬文武職官暨紳衿兵民人等知悉。以後凡有別省奸徒潛匿境內。收買婦女人口。及本省地棍代作牽頭。希圖勾引出界者。許諸色人等。藉訪得實。密報所在官司。擒拿重究。將婦女給還賣主。若能緝獲真正拐賊一名。送官審實者。官給賞銀十兩。仍

令親屬謝銀五兩。揚賊立斃杖下。若係果為饑寒所迫。情愿變賣糊口者。許將賣契送官。候其驗實用印。方准過門收養。然亦止許賣在本省。不許攜帶出境。如無印照。而私行貿易。及帶婦女出疆者。即係來歷不明。許親屬及捕役人等。擒拿首告所在。官司務行重處。本部院欲使離散之民復圖生聚。故為計念。及此官民人等。但各遵行毋忽。

保卹災黎示

江南佟壽民
廣華人
審憲

為特飭保卹災黎。以重民命事。照得天災流行。無代不有。雖閔氣數然。恃地方官實心保護。庶幾得望生

全。本司從前歷任。自州牧而郡守所在。亦時以災荒見告。無不率先勸賑。安插流移。日以此為經營。真有視民饑傷。如己饑傷之念。即今蒞任吳藩。凡聞每處災荒。即便捐銀捐米倡濟。與夫每年發賑。監倉收糶。官骸倡設藥局。凡諸閔切民命之事。靡不急為之。特是額俸有限。恒苦不能遍施。而又以身司督催外省。本省協餉兵餉。俱閔緊急軍需。不敢稍事姑息。近據所屬蘇松淮揚徐地方。紛紛瀝陳水災不已。既而淮徐等處。復又慘罹地震水決。種種奇凶。民之飢而或漂沒覆壓。而歿者。或見之繪圖。或得諸目擊。種種

流離。慘傷殊切。除一面捐發俸銀。就近于蘇屬糴買米麥。裝運各府州。分發賑濟外。第思饑民孔多。一餐之惠。難于遍及。不若該地方官。共推本司軫恤之心。交相勸告。以成善舉。如紳宦。可以勸助。當不惜為募緣。商民。願于捐輸。當不吝其獎勵。倉穀現有積貯。一面動賑。一面造冊報銷。俊秀有力。援納。一面收濟。一面取結詳送。以至房屋漂流之戶。或構草搭厰。可以暫棲。水流沉溺之屍。或義塚荒坵。可以收掩。使民之生者得以幸存。死者得以歸土。如是則散者復聚。何難變荒土為樂郊。至于凡在地方。一切省民財。惜民

力之事。誠得有司在在留心。其為不費之惠。當止無窮也。獨是地丁錢糧。今即以十分災荒入告。定例止蠲三分。餘七分。尚在應徵。有司查將寔寔被災花戶。日下即與炤例停免。不得仍行催追。以致復驚。逃徙。其有原係殷厚。向來收租辦糧之戶。今歲即罹重灾。容有上年餘蓄。仍即多方勸諭。若其亟公好義。措辦完糧。該縣即與備造花名文冊。申送本司。即不憚轉請各臺。特加優獎。以示鼓勵。合即出示通飭。為此示仰府州縣官吏。查炤飭行事理。即將該地方被災被傷民人。多方率屬。勸募賑濟。并有無倉穀。可以動

賑有無俊秀願甘援納仍將無棲止者設法安插暴
屍骸者酌地掩埋難民錢糧卽與帑例停免急公好
義者加意勸輸上不悞軍國下不病民生全在爾
地方官寔是奉行本司一面察訪如果無郵有方安
插得所勸捐勸輸恩義兼至者立卽明列愛民實政
以卓異保舉揭薦各臺特疏題請如不閉心民瘼
及奉催提緊餉唯圖藉口卸責本司定將膜視民命
玩違職名密揭開報勸懲具在其各慎思無忽

荒政五 勸周貧佃

救荒第二示

六合顧南樓 諱高嘉 秀水人

爲勸週貧佃以固本業事照得田主之與佃戶相依
爲命者也歲豐則均享其利歲歉則並罹其殃然豐
歲多而歉歲少惟賴有無相通患難相恤故雖遇凶
年猶可轉禍爲福以待其稔此情理所必然也目今
遍野飛蝗夏秋無雨禾苗絕望籩豆不登除一二不
罹旱蝗地方外其餘災傷處所滿目荒蕪塵生釜甑
夫妻父子束手哀號本縣目擊心傷救荒無策再四
思維爲爾貧農籌畫饑寒所迫勢必流亡但今各處
告荒孰爲樂土故鄉生長之地親戚聚居尙且無可
資生一日流落異鄉舉目無親無房可棲無事可做

憑何術以養生其為死亡一也。况當 功令森嚴。面
生可疑之人。到處盤詰。即有熟識在彼。自救不暇。安
肯容留。是爾民一離故鄉。其他備困苦之狀。更有不
可勝言者。也不若株守阡陌。苦覓升斗。苟延旦夕。轉
盼金風。肅殺。蝗絕雨滋。亟種二麥。以收桑榆之獲。自
然苦盡甘來。室家如故。然無米之炊。不能枵腹而待。
此則爾各業主切膚之痛。亟宜多方週恤。自為為人
以圖後効。極知時值災禔。下絕廩。度上歸 國課有
產之家。亦苦不足。然此時不為救濟。倘佃戶逃亡。無
人耕種。久遠之業。一旦拋荒。將來賠累無時。底止豈

等知悉。一應舊通宿欠。槩行停止。不許追索。俟天意
回祥。歲禾稍熟。總計本息。一併取償。倘冒利不遵。立
拿懲究。本縣薑桂性成。不畏強禦。卽
朝廷正供。錢糧尚且不避斧鉞。立懇上臺。暫停徵比。
何有于豪強之私債乎。勿逐蠅頭。致干法紀。至于欠
債窮民。亦宜感茲義舉。無負本心。稍俟有收。卽當完
楚。不得以本縣告示。藉口便想。賴過今生。若到該償
之日。恃刁不還。破人。發者。本縣卽當以爾來生果
報現之。今生嚴追。痛比之下。非復人形。與變牛變馬
無異也。特示

荒政七

祈雨示

二日復大雨三日過止

瓊州姚遂菴江陵人

為祈雨事。照得瓊土自正月至今四月不雨。本廳晨
 隨道府步行。詣壇行禮。祈請儀文無所不備。一月有
 餘雷而不雨。如聞左側。大戶貸錢每日造門。但得唯
 唯而已。本廳憤極。再不跟隨行香。發願縞衣草履。步
 行烈日中。逢廟叩頭。日行三十里。城內外無廟不到。
 食粥一盂。不扇不葢。薄暮歸。卧門扇不帷。不席。如此
 二日。倘猶不雨。本廳情願與囚同處。不雨不出。諸色
 人等。有願隨本廳者。自明日始。

激烈回
 天不是
 尋常苦
 窮計

非計小而遺大。舍本而務末者乎。為此示諭概燃軍
 民人等。凡窮佃三口以上。各業主借米一石。五口以
 上。借米二石。其有好義多與者。不在此列。雖不能計
 日受餐。亦可少資。饘粥令其別為營運。以俟麥秋。其
 佃戶之稍稍溫飽。可以自給者。亦不在此列。如此則
 業主保其恒產。佃戶安其室廬。所謂人心既固。天不
 能災。眾志成城。蝗亦退舍。一舉而兩得之事。豈不
 後如有退田退牛等事。即以惰農之法懲之。幸各盡
 血誠。交相勉勵。慎毋自悞。以致噬臍。

荒政六 禁索私債

救荒第一示

六合縣尹顧南樓

為勸諭緩徵私債。以甦荒困事。照得民間稱貸。原以濟緩急。通有無也。但歲當豐稔。則並權子母。而有餘時。值凶荒。則微較錙銖而不足。惟是因時斟酌。舒疾合宜。斯見仁人君子之用心耳。目今天時亢旱。十室九空。飢饉洊臻。流亡載道。朝夕之謀。尙虞不給。賦稅之苦。甚於剝膚。安得餘貲以償宿負。惟有稍寬歲月。以俟有秋。則名實兼收。利義兩得。如或為富不仁。惟利是視。不能救災恤患。逼人剝肉醫瘡。驅之溝瀆。迫為逃亡。民獨何辜。堪此重困。為此示仰闔縣軍民人

祈求雨澤事

淮揚漕撫蔡魁吾

照得時當播種。急望甘霖。亢旱為災。三農束手。設壇致禱。往事有然。齊心竭誠。於今宜茲。古人有一善言。而災惑退舍。昔賢行一善政。而甘澍如期。無事故羹虛文。所願誠心悔過。簡刑薄罰。潔己愛民。有利必興。有害必剔。自非省躬刻責。無由感格蒼穹。如徒粉飾鋪張。何以挽回。天意本郊院為諸司之倡。設立六事。期各遵行。慎毋玩忽。

荒政八 勸民修省毋災

勸諭士民齋戒等事

六合縣尹顧南樓

資台新書二集卷十四

秀水人

官禁屠而食肉者如故止為屠戶作生涯以禁屠則肉價必昂也然屠戶又為音輯作

生涯以所昂之數不足飽此輩之谿壑也訓誠及此可謂無不獨

照得棠邑凋罷民困已極自夏及秋先經螟螣作祟四野被傷既又旱魃為災千巖盡赤倘使秋成失望必至饑饉洊臻貧民轉于溝壑富室困于輸將非特本縣之痼瘵亦合邑切膚之患也奈珪璧既罄炎威愈烈木縣對臨天日憂心如焚虔誠齊沐步禱雩壇引躬自責以祈昭格所有屠酤之禁從來禁而未止地方奉行埃查反開禁詐法門無益于物命而徒累于小民本縣所不為也但福善禍淫天心豈無仁愛救災恤難萬姓自有同情睹此亢陽深思隱患誠對酒為之不歡列珍不能下咽而猶有飲酒食肉以為

樂者非夫矣本縣誠望爾民之各自為禁所謂以不禁禁之者也為此示仰概縣士庶軍民人等各宜滌慮洗心省身悔過合城齋戒共挽天災庶望油然沖然立見雨珠雨粟倘有匪類敗群故彰腥穢此即天之慘民王法或不及鬼神斷不爾宥也眾各觀省戒之毋忽

風俗一 禁尚奢靡

禁娼館

湖南周文夏諱李琬

為嚴革澆風以清蠹害以杜亂萌事照得楚省土曠民窮繼出湯火羽善未息供應浩繁解草運糧跋涉

卷十四

十七

艱苦本院切切在念每為中夜徬徨何物奸徒某某等乃敢設館停娼牌名歡樂期以煽惑良稚伏蕩傾財所開風化不小蓋酒脯營生從來不廢然以充行道之饑渴則家常茶飯儘堪果腹若神衿巨室宴會賓朋各有所居必不失足於外凡此娼戲酒館無非蠹役棍徒招搖聚會之藪或包攬詞訟于此地說合調停或結黨朋謀于此地誓盟歃血又或濫差虎役簽票在手勢挾鄉愚恣其飲噉公庭未到曲直未分而一舉箸間已破中人之產矣且演戲聚觀奸良莫辨開場賭博賊盜潛滋儻有神奸不軌鼠跡其間為

憂實大除將守武昌道解到犯人某某等量行責懲其娼婦碧霞等速行驅逐外合行出不曉諭為此示仰軍民人等知悉嗣後如有再犯者嚴拏究擬决不輕貸

風俗二 禁止游觀

綢繆未雨事

江寧別駕古掌綸諱世美宛平人

照得省會繁區五方雜處摩肩擊轂好醜難稽雖時加警惕尤虞旦夕之或弛即巷肅街澄尙慮柝鈴之未及近見居民以神燈為事戶懸巷設男婦紛紜歌唱管絃夜分不輟俱神原屬善舉祈福所以獲災習



良物之言才人
之輩補人循吏
傳中亦是大史
公得意文字

久成風本廳同難禁遊竊恐池玩足以生奸樂極易
以致禍備重門深迥舉室玩賞于前鼠竊覬覦于後
一旦乘間竊發不幾求福而致禍歟事起于所忽弭
患下未形本廳從地方起見不得不為警醒非不知
樂民之樂而故為此迂腐之言拂民情而撓善事也
合行嚴飭云嗣後止于初更時候點燭一枝燭盡
即止各家婦女不得出閨游玩致妨家業况張燈原
以供神非為耳目之玩且自七月至今燈之趣味諒
已厭足于中亦當止乎其所當止如有仍前玩忽不
遵戒諭止圖耳目之歡同顧地方之患既有不測地

方總甲及事主人等均罹嚴刑毋謂本廳言之不早
風俗三禁尙邪教

禁妖僧異服

蘇州署吳蛟本諱江倅
郡別駕

申嚴妖僧異服之禁以維風化事照得焚修證果道
行可師禪衲之中不無高品但能栖心澹泊厭絕奢
靡始可參禪悟道松風桂露時憑布衲携來水月蘆
花不惜芒鞋踏破未有身披艷服態習油腔狂且其
貌而能佛氏其心者也本署昨偶公出見有遊僧服
絳藕碧蓮紅睥睨道旁自矜綉美本廳見之不勝駭
愕蘇郡固屬巨邦虞山風稱名邑即士流百姓崇尙

靡文。為民上者。猶當砥礪頹風。使歸醇朴。何況緇流。服艷明屬。誨淫世道人心。雕傲極矣。若不極力挽回。後將何底。除已往姑不深究外。為此示仰該縣寺院住持知悉。即便傳諭僧眾。恪守清規。布服芒鞋。僧家本等。稍涉富麗。即是素行不端之人。許即鳴官究逐。倘再隱留一經查發。斷不姑饒。法紀所在。剛斷即是。慈悲本願。欲作護法。韋馱正當在此處着力也。特示。

辟邪教

河南巡撫賈膠侯諱漢復山西人

為嚴禁愚民崇尙邪教。以遏亂萌事。照得左道異術。惑世誣民。為首絞辟。附從流徒。載諸新例。何等森嚴。

無奈愚民不知醒悟。殊不思聖賢立教。原自明白。正大舍此而外。卽為異端。從古以來。妖言惑眾之徒。邪道倡亂之輩。代不乏人。始因無籍之景從。遂成燎原之難撲。以致流禍郡縣。荼毒生靈。草竊一時。終膏斧鑕。歷觀往事。亦邪教害人之大較也。中州川原遼闊。地蕪民貧。奉法治生。是其本分。乃有無知愚民。厭常喜異。棄正崇邪。皈依白蓮大成皇天等教。聞香聚會。男女混雜。陽修善事。陰構異謀。近日許田洧川之變。實起於此。若不盡絕根株。恐貽將來隱禍。又憐此輩無知。皆我赤子。安忍不加勸誨。但以法繩。合行出示。



禁諭爲此示抑撫屬軍民人等知悉示後各宜悔悟
改邪歸正附從愚民亦當速行解散各務農業毋得
三五成羣夜聚曉散但看守正首有妻孥生聚之樂
信邪者有死亡流徙之苦轉移只在一念之間苦樂
遂有天淵之隔清夜猛省勿再執迷云

風俗四禁賭博

禁賭博示

閩西李含馨諱月桂
守憲

爲嚴禁賭博以靖盜源以安地方事照得農工商賈
各職其事財用於是乎出衣食於是乎克無論務本
逐末總期三時不廢而工利相資庶幾家給人足以

成熙皞之治有等遊閒無藉之徒不循本業專以陸
博爲生每每結黨成群煽誘良家子弟窩賭騙財惟
圖自己飽衣煖食不顧他人敗產傾家不肖子弟一
墜其術率皆迷而不悟不死不休以至窮餓其父母
凍餒其妻子親友姍棄隣里譏彈且賭窮爲盜勢所
必至越禮敗行何所不爲殆至犯法亡身悔何及矣
新旨森嚴設有流徙站配之典亦無非爲不肖愚民
下此頂門針令改過遷善以自保其身命耳爾等自
思亦何苦不學好人而甘蹈法網也台行出示禁諭
爲此示仰闔屬軍民人等知悉如有前項匪徒卽速

煎洗肺腸。改圖變業。如有怙終不悛。則今日之遊手。即將來之盜賊。本道務絕其源。立刻嚴拿。從重究遣。非懲賭博。乃杜奸萌。勿怪本道行法之太峻也。
風俗四誠。生

立法勸諭等事

江寧俞視如諱滋慧
邑宰新會人

照得江寧一邑。糧無項戶。訟鮮才詞。風俗可謂醇矣。惟是本縣蒞任。未及兩月。見民間自縊暨投河淹井之事。數數見告。查其致死之由。非有奇冤大抑。力不能伸。亦非有勢焰豪威。逼不可受。止以家庭細故。鄉曲微嫌。偶爾致爭。遂付身命于一擲。甚至有以衣食

不敷。疾痛難忍。亦遂覓此短見者。司牧者見此。能不愍焉于中。但既事關人命。無不相驗之理。察其有無別故。始憑報憲。本縣事務殷繁。不能一一親理。勢必委之衙屬。而衙屬所司。又非一事。或遇別冗。勢必暫停。及至勘驗得實。已經暴露多時矣。目擊蠅蚋。始嘬之極。慘雖孝子。不能掩其親。明知血肉糜爛之堪傷。卽循吏不能已其事。既無偵恨難容。又非深冤莫解。何故自棄其生。又復蹈此身後之餘慘。甚爲吾民不解也。殊不知因緣果報。絲粟不爽。前生釀今世之因。今世伏來生之案。是孽皆由于自作。怨尤無損于天。

人動輒忿爭。突然自盡。是前世之因。才償而後世之孽。復作矣。世世沉淪。曷其有極。况疾病有痊可之時。貧窮有剝復之理。小忿小嫌。事過即解。何至自輕生命。永墮重泉。殊可浩歎。願我民交相誥誡。使愚蒙警醒。咸登壽域。享考終之福。正丘首之仁。有裨民命。豈淺鮮哉。本縣細繹其故。凡民輕生。雖屬死者之愚實由生者之忍。使家人果能消弭。隣佑善于解紛。豈致積怨叢尤。釀成此禍。自今以後。凡有自縊投河淹井等項。除真正有人威逼。及用強毆打。以致自盡者。自當照律究擬外。如止因前項細故。並無不解之讐。爾

等家人隣佑果能力為勸解。曉以因果。諭以生死大道。自然反迷成悟。樂生畏死。若復因循坐視。見死不救。從來幸災樂禍之人。即是唆爭起鬪之人。本縣既傷死者之難生。必恨生者之不救。從重究懲。以挽頹俗。爾民慎毋泄視。謂此罪為律文所不及也。

勸諭愚民等事

六合顧南樓 高嘉秀 水人

照得六邑民風剽悍。好鬪爭勝。每因細微起釁。輒以身殉。或投塘。或自縊。甚至一朝之忿。斷頸不顧。原其設心。不過謂以死相博。遂可破其身家。泄我忍恨。伏讀律例。一坎凡因事威逼人致死者。杖一百。追給埋



墓銀十兩。猶必審有可畏之威。始合此律。若平等之人。罪又在所減也。夫親身之痛。何等重大。止博一杖。况本縣承乏三載。從來慎刑去罰。就事原情。一審卽結。斷無破家之累。彼以性命輕試。不幾等若鷓毛。深可痛惜乎。爲此示諭。概縣軍民及保甲長鄉耆各要。遍相申飭。父子夫婦兄弟間。尤當朝夕勸戒。慎毋片時抱憤。飲痛九泉。本縣婆心懇切。萬勿過耳不入也。特示。

風俗五 勸埋柩

募勸掩棺瘞骸

杭嚴黃口口 諱鳴俊 巡憲 福建人

吳越向多火化水淪之風。司牧者以禮教董之。封阡始盛。然力艱弗舉。地遠弗歸。與夫拘牽於陰陽干支之說者。不免暫停。積以待首丘。而一時射利之徒。遂築土爲居。廣招寄頓。素直不遂。則委之戶外。飽饑薦而飢聚蟻。其去火化水淪也。無以異。此廓除之厲禁。所繇興也。夫家稍殷。可拘牽於陰陽干支之說。以須尺一檄之自埋足矣。若力艱弗舉。地遠弗歸者。無漏澤以安其魄。無資錢以給其傭。而徒爲厲禁。曲之。不仍委白骨于荒郊。悲青燐于永夜哉。幸撫院諭按院方。慨然以捐鏹置地爲已任。而本道與府縣諸僚相

率從事。神饗長者。復從而擴錫類之仁。欲本道出一
言為激勸。夫仁人惻怛。因物而拯。期乎無憾。東坡之
贈李廌堯夫之贈曼卿。彼豈羨西伯本支百世之報
始為是善舉哉。迺今之好施崇祀。多方佞仙佛者。將
以廣福田也。彼一土木耳。相與雕鏤之丹青。之金碧
宅之鐘磬。奉之以求夫介紹于上帝。寵綬百祿。至於
胞與形骸。秦越相視。一付之烈日炎風。寒霜冷露。之
塲。即自為福田計。而孰妄孰真。孰緩孰急。寸地應自
了。了固無俟持鉢者之遍為饒舌矣。本道執是以祇
告同志。共樹陰功。若夫卜地宜高燥。瘞禩宜標題。以

及受僱給金有條。請佃自封。咀撓後墓。有禁尤願在
事諸員。役力行而曲體焉。

風俗六 禁質女

禁典妻女

嶺州姚繼菴 諱士升 江陵人

地無華蠻人自蠻之瓊俗之陋。未有甚于質婢者也。
閩左之氓生女。或十餘歲。輒以質錢。有至二十以外。
未得贖嫁者。所質之主。或轉質。經數家。絜瓶之智已。
不可問。寄珠越宿。又安盡保其故吾耶。本廳每聞訟
謀間。有此事。蹙額切齒。既而思之。斯皆為爾上者。教
資台新書二集卷十四

爾而文

林千

每見有
鄭衛之
君樂談
鄭衛之
俗者視
此當居
何等
聖心佛

養無方豈弟之未至而爾等饑寒徭賦迫促無聊墮壤廉恥之故也夫俗至典僱子女以克公私之用而為人上者尚恬然坐堂皇食處如恆不一痛心引手其為鮮廉寡耻何僅在下本廳願與爾民蠲前宿耻再整廉隅以挽頽俗并與諸富家受質者暨兵丁有前此准債收質者約限五日內盡赴本廳首報凡有質者計年除值五年以上者徑還本主三年以上者半贖不及三年者三之二贖其價買非質當者不在此例有力不能者本廳雖貧願為爾代再不足為爾募富家兵丁有能讓減者佛天聽早凡有福田利益

有至情
自有至
文不求
工而工
之至矣

悉歸爾富家兵丁本廳無預相與共成此一畧太陰騰返蠻俗而歸華醇大家合掌天人拱聽嗟乎至尊萬乘尚放宮女三千吾儕小人可憐蠅頭什一不過取懷之予便是再生大生本廳負此募簿廣求慈悲倘或堅執亦能捧喝當頭也特示

風俗七 禁錮婢

禁止錮婢不婚等事

全華 羅鏡菴 江都人

照得男女匹配理合陰陽婚嫁踈跂事于倫理男子弱冠而婚女子及笄而嫁此古今不易之規例也訪得發州惡習民間婢女有年至三十四十而未嫁者

資治新書二集卷十四

本子對

甚有禁網終身髮白齒落而未經字人者是天地間
陰陽二道竟屬徒然夫婦一倫總成虛設悖理傷化
干犯天和莫此為甚此皆富家大族喜用無夫之女
便于出入房幃怒其一經配合即分事主之勤以修
愛夫之好是以日復一日年復一年遂不覺老之將
至及其老也欲行配合又無樂受之人此其所以不
處一生永乏于歸之日也大姓若此貧家小戶又復
尤而效之父母之子子傳之孫遂成今古相沿之惡
習若不遇一辣手之官嚴加禁革擇一二頑梗不遵
者盡法懲之則此陋習頹風流將安底試問呼奴使

婢之人孰不有兒有女胡不設身處地試一忖量親
生兒女過期不嫁父母有不哀憐兒女者乎兒女有
不怨恨父母者乎人有尊卑情無上下何怨于待已
而刻于待人乎且凡民之家畜一牛羊犬豕尚思為
雄覓雌移牝就牡而獨于婢子不然何慈于待物而
忍于待人乎汝身自有妻妾汝之兒女亦各有夫婦
皆其習聞而熟睹者窺此琴瑟之歡增彼向隅之泣
此種人情不加體貼豈真鐵石為心者乎合行嚴飭
為此示仰合屬軍民人等知悉凡有了鬻婢女年過
二十以上者不論大家小戶總以一月為期或外嫁
資治新書二集卷十四

良民或內婚僮僕。盡行配合。如過期不嫁不配者。許地方鄉保人等指名首告。以憑盡法嚴處。其婢女即着地方鄉保。擇貧窮男子之無妻者。至木廳當堂配。合量給聘資。不准全禮。此後著以為例。凡屬民間使女。婚嫁之年。總不得過二十以外。茲本廳一面出示。一面申詳各上臺。事關移風易俗。諒無不批。允飭行者也。特示。

風俗八 禁造訛言

諭惠潮二屬

嶺東兵憲李包開諱文煌河南人

為嚴禁訛言惑眾。以安地方事。照得我 朝定鼎法

制修明無一舉而非仁民愛物之心。無一行而非保民致治之事。粵東界在南服。去京師遼遠。有等不法奸徒。慣倡異論。搖惑地方。茲又訪得前項奸徒。創言流布。有選取幼女寡婦。克為宮使。以給蒙古之說。致使里巷愚民。承訛踵謬。各將賢淑幼女。混嫁非偶。之徒。三從罔顧。六禮不行。且有守節多年之嫠婦。忽抱琵琶。從戎未返之征妻。頓乖琴瑟。傷風敗俗。壞法亂倫。莫此為甚。除一面嚴訪造訛之人。按法重處。外為此示仰闔屬諸邑人等知悉。爾等從前所聽。盡屬訛言。毫無影響。自示以後。各宜安心樂業。無得輕舉妄

勤以致倫理乖張。男婦失所。如有云許。特巡員役及地方人等。密訪得實。或稟該地方官。或卽具呈本道。以便嚴拿嫁娶之家。并媒妁人等。立置重法。決不姑貸。

風俗九 禁屠牛犬

通行各屬牌

甘山 袁蓼匪 濟寧人 巡憲

為察禁屠牛以清盜窩。免妨農作事。照得宰牛之禁。奉旨申飭已久。軍興以來。椎埋犒饗之餘。所存無幾。加以盜賊遍鄉。狼饕鼠竊。專盜耕牛。以致田畝拋荒。農民棄業。茲值封疆稍宴。內城外鄉。積盜芟除。八

九小民甫得買牛耕種。聞有不法之徒。盤踞鄉村。鼓刀而屠。弱肉強食。一窩買賊牛。半夜來者。半價而售。五更到者。量與薄值。影附豪惡。威稜假託。營兵資本。勾結城市。積棍表裏為奸。或借名官買。驅趕入城。或裹藏肉贓。挑進販賣。屠家恣意吞肥。盜賊希圖滅跡。間有失主。追踪躡跡。尋至伊家。畏懼惡焰。不敢告發。告亦不得真贓。所以忍氣吞聲。明知已物。無從識認。是宰牛之人。久作強盜窩家。地方有司。未嘗過而一問。不幾絕此種類。以供若輩之砧俎矣乎。除城內數家。諭令悔過改業。一面條引律例。出示曉諭。禁絕

外合就通飭。為此牌仰西寧甘山等處各州縣衛云。如有損傷病死之牛。本主赴該縣呈報。驗明批照。方准開剝。不許里保差役借端詐騙。其官買迎犒及取用皮角。責累當行原屬未流苛政。有傷治體。願我賢有司併行蠲除。勿致仰干明禁。下病農功。為盜賊增一淵藪也。

嚴禁私宰

房山佟字六諱有年邑令

照得買犢為治。耕牛居農力之半。即以朝廷之上。非郊祀大典。勿輕用也。其中果報更難枚舉。本縣未暇宣諭。但彼有功于人。無故恣情一割。抑何忍也。且

大年滋茂。原非日用必需。嗟此凶荒。半粟不飽。而尚幸特牲以克口腹耶。非唯罪孽難逃。兼且暴戾天物。本色向無私宰屠行。恐僻遠鄉鎮或有忍心射利者。不得不通行申飭。

嚴禁宰牛

六合顧南樓諱高嘉縣尹

為嚴禁宰牛。以肅功令。以禳旱災事。照得屠牛之禁。登奉嚴諭。屢蒙憲檄。本縣禁飭再四。不啻頽頽舌傲矣。奈罔利之輩。怙惡不悛。貪戀蠅頭。甘蹈法網。不思萬物之中。惟牛最靈。亦為牛最苦。佐民耕稼。則犁雨鋤雲。力任輓輪。則任重致遠。誠以力濟人之物。



無意為
交而自
然典雅
望而知
為捉刀
本色幕
由之文
不若是
也

有功于世者甚大。乃肉飛血灑。慘目傷心。就戮而哀。鳴鼓刀。而墮淚。觀其殷。深可憫。憐。故殺牛之禁。不惟王法甚嚴。抑且冥責尤重。歷觀因果。報應昭然。爾等誠于清夜。捫心自反。積孽百務。皆可資生。何必操刀為活。五味盡能適口。奚難舍此一嚮。目今上天。垂戒。八夏亢陽。民力竭矣。何堪再罹凶年。過則改焉。庶可挽回天意。為此示仰。概縣軍民人等。凡宰牛屠戶。俱限三日內。毀鍋改業。地方隣里。具揭報查。倘視為具文教。而不改。本縣薑桂不移。有言必信。或經告發。或由訪聞。立賞重典。勿謂鬼神可欺。三尺可漏也。

所有宰牛報應。採其尤者。列後為合邑百姓勸懲。其各錄記家諭而戶曉焉。

計開

一平泉陸公會試時。王陽明先生之父海日翁。為郡太守。夢見城隍。庭下皆係陸善人。問之。名樹聲。明日召陸公。外父李秀才。問之曰。汝好牛。口何為。後夢如此。可異也。李對曰。是常勸人勿食牛肉。者已而遂報會榜第一。

一縉雲管樞密師仁。少時元旦五鼓。遇大鬼數輩。形狀猙獰。問之。對曰。我疫鬼也。今行疫人間。仁曰。吾家

有之曰無也何故得免曰不食牛肉

一萬曆己酉科。應天府庠李鑑。祈夢神祠。夢與楊應文同榜。楊名下大書祖父陰功浩大六字。更畫一牛像。在旁。李查訪庠籍。有楊應文姓名。謂必同中。及院試。楊生不得科舉。李入場。快。快。自失。泊揭榜。有楊應文同榜。乃常州無錫人也。因詳扣楊氏。前代陰騭事。楊云。其家不宰生不食牛。已三代矣。

一秀水包孝廉。諱世杰。刻耕牛。苦偈告世。舉家不食。

一子包鴻逵。順天發解。一偈陳萬言。浙江發解。

一龍泉邑趙太保。好屠牛。常買三牛。已宰其一。一夕天未明。忽魔作哮吼聲。經日不醒。急呼醫者用藥。救療方甦。家人問故。曰。適見所買一牛。忽作人語。曰。吾爾父也。一曰。吾爾祖也。須臾二牛皆人形。熟視之。則皆吾父吾祖也。哀號懇切。驚駭而覺。卽以一牛付之。庄田。自是改業。

以上係烹宰善報

一宋房州李政。爲保正。頑猾健訟。交結吏胥。巧爲囑托。官司莫能治。性酷好牛肉。每至人家。爭以牛肉餉之。逾量酣飲。然後肯去。稍不如意。卽以事踪跡人而中之。淳熙四年。暴亡。其家牝牛。當生一犢。腹下白毛。

成保正李政。四字人有來觀者。則坦腹以示。每見妻子。輒流涕。後復為虎所食。骨肉皆盡。

一奉新縣村民。繫牛于柱。將殺之。其隣家子。平日饕食。乘醉人觀。踞坐指屠者。速操刀。我欲肺膈生食。不宜緩。仍不可與他人。語至再三。牛忽驤首怒目。直視此子。奮力掣索。索斷直前。徑觸穿其腹。戴之以走。過四十里。不脫。鄉人及其子弟。奴僕百餘人。槍杖叫噪。其往追逐。乃得其尸。

一鎮江華回子。父子宰牛。忽仆地作牛鳴。臥病月餘。額生雙肉。角長寸許。死時人皆聞牛尸氣。

一景世庠。死至陰司。見囚徒甚衆。一沙門地坐。前列簿書。斥世庠曰。汝本應福壽。坐殺牛三百。七啖犬肉。合當貧死。世庠曰。食犬有之。牛實未嘗殺也。沙門曰。汝為里正。里中殺牛。而汝不禁。與汝殺何異。姑還警世。越明年復卒。嗚呼。以不禁殺牛。而遽坐以殺牛之罪。陰司法網之察如是哉。

一太和中。光祿廚欲宰牝牛。牛有胎。不久合生。或議以他牛換。屠者不聽。操刀而前。牛乃屈膝而拜。屠竟殺之。後屠者狂走失常。每日作牛啼。食草少許。身入泥中。以頭觸物。良久乃死。

一宋譙國城父人王曇首常以牛作脯為業一日殺牛牛見刀輒跳躑欲走曇首怒乃以刀刺牛目少時目眼無故流血遂盲

一廣陵朱氏子家世勲貴性好食黃牛所殺無數常于暑月中欲殺一牛其母止之曰暑月如此汝已醉所食幾何勿殺也子向牛言曰汝能拜吾吾赦汝牛應聲下跪而拜朱反怒曰畜生安能會人言立殺之數日病恒見此牛為厲竟作牛聲而死

一滁州人姓來名安屠牛為生每令其子視其用刀欲世為業一日安酣寢子以為牛持刀斷其首眾駭

曰汝何殺父子曰我見是牛不知是父父常教我殺牛今見牛睡試刀法耳殺牛而白死牛之下并假手其子此報大奇

以上係烹宰惡報

禁宰耕牛示

錢塘 梁治湄 諱允植 邑宰

照得牛之為物上應天星下闕地利有功于世無害于民故宰剝耕牛禁例申明其來舊矣本縣蒞任兩載未獲仁民敢云愛物但思朝廷無故尚且不殺小民有禁輒敢私屠况適口充腸儘有肥羊嫩豕邀賓宴客復多海錯山珍舍此不

食而必欲害此勤勞善物稼穡功臣却是為何殊難
索解合行嚴禁為此示仰軍民人等知悉嗣後倘有
仍前開張舖面屠宰公行罔知畏懼者許地方總保
不時稟報以憑立拿按法重治互相容隱者察出一
併究罪

禁剪竊示

江南陳司貞諱秉直

為嚴禁剪竊之害以安地方事照得欲清盜賊先嚴
捕役欲靖根株務究窩主此端本澄源之法也近聞
省城內外有一種剪捨積賊每日三五成羣在鬧市
之中窺探行人腰纏乘隙剪捨及其知覺而各賊業

心若始
磨之鏡
明燭秋
毫又能
追本窮
源扼其
樞要無
怪乎大
江南上
替領神
明至今
不去口

已遠遁在本地居民尚不能訪緝追尋若遇外來之
人茫無適從苦將誰告訪得剪捨竊賊各有地方及
窩家如某方剪捨即尋某方捕快便知某賊根山但
捕快追尋俱視失事人之強弱如遇能事之人恐鳴
官府先與講明謝禮然後為之訪緝雖不能得物之
全亦或少歸其半如遇無能為者既索酒食又索尋
物之資未有所獲先有所費日久無奈只得含忍寢
息其所失之物捕快與賊因而瓜分此捕窩通同剪
捨之害乃日間事也當此隆冬正盜賊生發之時城
南地方人烟湊集柵欄嚴密夜間或可無虞惟城北
資治新書二集 卷十四

僻靜地方。人民稀少。巡緝不密。盜賊時時竊發。失主誠恐拖累大半。隱忍不報。以致夜夜不寧。皆因捕快素養積賊。小得則月月納獻。規禮大得則賊物均分。此捕快通同積賊之害。又夜間事也。嗟。嗟。饑荒之後。小民尙未甦醒。何堪日夜荼毒。本司爲爾百姓籌畫。不能安枕。除檄行南北西捕官。并上江二縣。每逢初二十六。投遞各捕有無失事。甘結去後。仍令該廳縣將素養剪緝竊賊。各捕快拿究外。合示嚴禁。爲此示仰軍民人等知悉。凡有剪緝搶竊等害。如某方失事。卽尋某方總甲。并守方捕快。着落追尋。如不追尋。卽

稟報廳縣。若廳縣不爲追拿。捕役勒索酒食資財。將事主拖累日久。所費不堪。等弊。許赴本司不時稟稟。立拿查實。官則報參。捕則處死。務期盜跡盡絕。如未經投遞廳縣。及捏報私讐。審明加倍重處。其剪竊各賊。窩家地方。隣甲隱匿不報。查出並坐不饒。特示。

祭把持婚喪需索重費 江南 陳司貞 詳乘直 泉憲 海城人

爲嚴禁市棍把持。以便民情。以肅法紀事。照得本司秉憲江南。釐奸察吏。惟期訟簡刑措。弊絕民安。故凡地方利病。靡不悉心探訪。極力興除。近訪有亭彩鋪戶。結黨齊行。向來各分地界。使民間需用。不得赴他

上之爲 善處處 皆然而 江南九

甚至于
轎脚等
夫之勒
詐其害
更甚常
有一婚
一喪而
索錢數
十千不
止者喪
家慮費
每停十
餘年不
舉自公
禁後家
無久滯

方擬游任彼高擡租價恣意勒索凡有婚喪之家不
用既不可別租又不容勢必厭其所慾而後已。是亭
彩舖戶把持措勒已于民久不稱便。又有轎燈租器
舖戶向俱隨處租用。近亦效亭彩之尤不特各分地
界更且擅立公店科歛公費。又有鼓吹樂工亦分地
方互相把持。斷網利婚喪之家大受其害。若不嚴
加禁革將來事事效尤為害地方終無底止。至馬頭
脚夫雖云各守本坊然遇事多勒僱價不容別覓亦
屬把持。強梁肆害均為不法。合行嚴禁。為此示仰舖
戶軍民人等知悉。嗣後民間凡遇婚喪租用亭彩燈

之棺澤
及枯骨
仁人之
利溥矣

輜井僱覓馬頭人夫等項悉從民便聽其隨處租覓
不得仍前結黨把持分派地方及設立公店多勒租
價如有故違許被害人等即赴府縣首告拿究申解
本司以憑盡法究處不貸

禁喇棍叫好示

江甯陳司貞
臬憲陳司貞
海城人

為嚴禁叫好喇棍以清盜源事照得江甯省城風俗
素稱純樸豈今近時囂風日熾出一種無賴喇棍似
乞非丐遊手好閑以精壯之徒故作窮兇之態每日
窺探婚嫁喪壽大小有事之家或三五成群或十餘
人一夥到彼說汕語數句名曰叫好因而索錢索酒

切以善

稍不如意即行辱罵若與理論即肆兇打庶民之家寡不敵眾難與相爭富貴之家又體統自重不屑與之較量每每含忍聽其擾害所詐之錢動以千紀以致此輩相習成風全無顧忌竟以此為應得之常例當場議價開口動索數十千人畏其克止求減而不敢逆更可慮者此民間吉凶喪娶親朋畢集往來雜沓最易疎虞此輩名為叫好實窺家室之盈虛并探門戶之出人以為盜竊計耳青天白晝行兇如此若在昏夜何事不為古云清盜必清其源源清斯流不濁此等皆盜之源也地方官總未知覺以為乞化

小而不知為先生有焉

小節漫不深究烏知涓涓不塞流為江河此輩以乞丐始寧肯以乞丐終平除檄行南北兩捕官及上江二縣拿究外合行嚴禁為此示仰省城內外軍民人等知悉示後但有無賴遊棍假粧廢殘病丐三五成群仍蹈前轍叫好索詐凌辱扛打等情即著落守方捕役該舖總甲立刻鎖拿交付該管衙門枷示驅逐如捕甲不行緝拿查出加倍重治決不輕饒

禁破喪勒詐示

江南陳司貞諱秉直臬憲海城人

為亟除第一惡習以敦風俗以廣孝治事照得生養死葬人子所當為暴骨露棺不孝之大罪先賢有麥

既有此
等破耗
再加亭
彩樂工
輜脚等
夫之勒

索欲不
久停親
喪其可
得乎

舟相贈之義。凡民有匍匐往救之情。未有乘人之喪而反藉端擾害者也。本司訪得江南民俗。竟有祖宗父母。歿經數十年而未葬者。甚有歷三四世而停棺纍纍不能入土者。細察其故。皆由親族人等。執有破孝名色。一值舉殯。輒扶老携幼。擁坐喪家。需索酒席。務必暢飲歡呼。連宵達旦而後已。稍不滿意。或間有失邀。又必鬨然喧鬧。不容舉棺。富者雖遭破耗。猶能勉力為之。無力者束手嗟噓。惟有日復一日。年復一年。聽其暴露于家而已。更可怪者。凡人妻妾病故。不論有無別情。其父母親屬人等。必鬨聚偕家。先毀器

皿什物。以示威。然後勒令如何厚殮。如何齋醮。如何安葬。志得意滿。方許入殮。觀此舉動。是人之娶妻非以助家。反以破家也。休戚相共之誼。其謂之何。本司弼教明刑。職端風紀。似此惡俗。急宜掃除。合行示禁。為此示仰軍民人等知悉。凡有一切亡故。屍棺應葬未葬者。審已力量。隨時殯埋。倘有此等惡棍。仍執破喪名色。糾集多人。需索酒食。勒措阻撓者。許受害人協同地方總甲。立時呈報。所在地方官。解赴本司。除重責外。定以三百斤太枷。立枷一月。至于已嫁之女。身故。果有別情。官法具在。若係病亡。凡有親屬。打至

資治新書二集 卷十四 五

借家借端勒措者亦許受害人同地方總甲隣佑立時報官依圖賴律從重治罪決不輕貸

禁罡棍打降

江南陳司貞諱秉直海城人

為申禁打降痛遏罡棍以昭功令以安良懦事照得打降為害江南時有而蘇松尤甚如某等一有發覺本司即盡法處治隨經嚴飭在案仍恐此等棍徒怙惡不悛狐羣狗黨引類呼朋打造金剛羅流星鐵棍木棍鐵索鏈諸般兇器盟香會集不論吉凶慶賀之事即插身其中腹不醉飽不止橐不盈滿不休少有未遂蜂擒肆毆尤可恨者一遇訟事或原或被必先

投訴打降非未審以前四路兜拿毒毆則既審以後布陣攔打視人命若草菅藐官法如弁髦此真聖世之窮奇治時之構杌者也合再行嚴禁為此示仰所屬諸色人等知悉嗣後如有前項罡棍結党打詐把持官事仍于街巷邀截行兇者該地方巡捕官役即便擒拿解司以憑大法懲治其有在府廳縣衙門糾聚肆害該衙門不即擒解者即以不職揭察法在必行務淨根株以洗惡俗前項奸徒各宜洗心滌慮痛改前非無以身家性命輕試本司嚴法也

